

四庫全書

子部

欽定四庫全書

子部

薛氏醫果卷一

詳校官天醫院吏目臣周世泰

編修臣倉聖脈覆勘

總校官原任中允臣王燕緒

校對官中書臣李斯咏

謄錄舉人臣薛炳文

欽定四庫全書

子部五

薛氏醫案

醫家類

提要

臣等謹案薛氏醫案七十七卷明薛已撰已字立齋吳縣人是書凡十六種已所自著者為內科摘要二卷女科撮要二卷保嬰粹要一卷保嬰金鏡錄一卷原機啟微三卷口齒類要一卷正體類要二卷外科樞要四卷癘

瘍機要三卷其訂定舊本附以已說者為王履明醫雜著六卷陳自明婦人良方二十三卷敖氏傷寒金鏡錄一卷錢氏小兒直訣四卷其父鎧保嬰撮要二十卷又陳自明外科精要三卷陳文仲小兒痘疹方論一卷初刻於秀水沈氏板已殘缺天啓丁卯朱明為重刻之舊有明紀事一篇載明病困時夢已教以方藥服之得愈又夢已求刻此書其事甚

怪然精神所注魂魄是憑固亦理之所有不
妨存其說也已本瘍醫後乃以內科得名其
老也竟以瘍卒詬之者以為溫補之弊終於
自戕然已治病務求本原用八味丸六味丸
直補真陽真陰以滋化源實自己發之其治
病多用古方而出入加減具有至理多在一
味間見神明變化之妙厥後趙獻可作醫貫
執其成法遂以八味丸六味丸通治各病甚

至以六味丸治傷寒之渴膠柱鼓瑟流弊遂
多徐大椿作醫貫砭因併集矢於薛氏其實
非已本旨不得以李斯之故歸罪荀卿也世
所行者別有一本益以十四經發揮諸書實
非已所著亦非已所校蓋坊賈務新耳目濫
為增入猶之東垣十書河間六書泛收他家
所作以足卷帙固不及此本所載皆已原書
矣乾隆四十四年三月恭校上

總纂官臣紀昀臣陸錫熊臣孫士毅

總校官臣陸費墀

白鳥のついで

提要

欽定四庫全書

薛氏醫案卷一

明 薛己 撰

內科摘要

元氣虧損內傷外感等症

車駕王用之卒中昏憤口眼喎斜痰氣上湧咽喉有聲
六脉沉伏此真氣虛而風邪所乘以三生飲一兩加人
參一兩煎服即甦若遺尿手撒口開鼾睡為不治用前

藥亦有得生者夫前飲乃行經絡治寒痰之藥有斬開
奪旗之功每服必用人參兩許駕驅其邪而補助真氣
否則不惟無益適足以取敗矣觀先哲用芪附參附等
湯其義可見

州判蔣大用形體魁偉中滿吐痰勞則頭暈所服皆清
痰理氣余曰中滿者脾氣虧損也痰盛者脾氣不能運
也頭暈者脾氣不能升也指麻者脾氣不能周也遂以
補中益氣加茯苓半夏以補脾土用八味地黃以補土

母而愈後感於乾坤生意方云凡人手指麻軟三年後
有中風之疾可服搜風天麻二丸以預防之乃朝餌暮
服以致大便不禁飲食不進而歿愚謂預防之理當養
氣血節飲食戒七情遠幃幙可也若服前丸以預防適
所以招風取中也

一男子卒中口眼喎斜不能言語遇風寒四肢拘急脉
浮而緊此手足陽明經虛風寒所乘用秦艽升麻湯治
之稍愈乃以補中益氣加山梔而痊若舌瘡不能言足

痿不能行屬腎氣虛弱名曰痲症宜用地黃飲子治之
然此症皆由將息失宜腎水不足而心火暴盛痰滯於
胸也輕者自甦重者或死

一男子體肥善飲舌本硬強語言不清口眼喎斜痰氣
湧盛肢體不遂余以為脾虛濕熱用六君加煨葛根山
梔神麩而痊

吾師僉憲高如齋自大同回謂余曰吾成風疾矣兩腿
逸則痿軟而無力勞則作痛如針刺脉洪數而有力余

告之曰此肝腎陰虛火盛而致痿軟無力真病之形作痛如錐邪火之象也用壯水益腎之劑而愈先生曰向寓宦邸皆以為風恨無醫藥若服風劑豈其然哉乃吾之幸也竊謂前症往往以為風疾輒用發散而促其危者多矣

大尹劉孟春素有痰兩臂作麻兩目流淚服祛風化痰藥痰愈甚臂反痛不能伸手指俱攣余曰麻屬氣虛因前藥而復傷肝火盛而筋攣耳况風自火出當補脾肺

滋腎水則風自息熱自退痰自清遂用六味地黄丸補中益氣湯不三月而痊

一儒者素勤苦惡風寒鼻涕寒禁嚏噴余曰此脾肺氣虛不能實腠理彼不信服祛風之藥肢體麻倦痰涎自出殊類中風余曰此因風劑耗散元氣陰火乘其土位遂以補中益氣加麥門五味治之而愈

外舅年六十餘素善飲兩臂作痛恪服祛風治痿之藥更加麻木發熱體軟痰湧腿膝拘痛口噤語澁頭目暈

重口角流涎身如蟲行搔起白屑始信謂余曰何也余曰臂麻體軟脾無用也痰涎自出脾不能攝也口斜語澁脾氣傷也頭目暈重脾氣陷也身如蟲行白屑脾氣不能營也遂用補中益氣加神麩半夏茯苓三十餘劑諸症悉退又用參朮煎膏治之而愈

秀才劉允功形體魁偉不慎酒色因勞怒頭暈仆地痰涎上湧手足麻痺口乾引飲六脉洪數而虛余以為腎經虧損不能納氣歸源而頭暈不能攝水歸源而為痰

陽氣虛熱而麻痺虛火上炎而作渴用補中益氣合六
味丸料治之而愈其後或勞役或入房其病即作用前
藥隨愈

憲幕顧斐齋飲食起居失宜左半身并手不遂汗出神
昏痰涎上湧王竹西用參芪大補之劑汗止而神思漸
清頗能步履後不守禁左腿自膝至足腫脹甚大重墜如石
痛不能忍其痰甚多肝脾腎脉洪大而數重按則軟瀋余朝
用補中益氣加黃栢知母麥門五味煎送地黃丸晚用地黃

丸料加黃栢知母數劑諸症悉退但自弛禁不能全愈耳
庠生陳時用素勤苦因勞怒口斜痰盛脉滑數而虛此
勞傷中氣怒動肝火用補中益氣加山梔茯苓半夏桔
梗數劑而愈

錦衣楊永興形體豐厚筋骨軟痛痰盛作渴喜飲冷水
或用愈風湯天麻丸等藥痰熱益甚服牛黃清心丸更
加肢體麻痺余以為脾腎俱虛用補中益氣湯加減八
味丸三月餘而痊已後連生七子壽踰七旬外科精要

云凡人久服加減八味丸必肥健而多子信哉

先母七十有五遍身作痛筋骨尤甚不能伸屈口乾目赤頭暈痰壅胸膈不利小便短赤夜間殊甚遍身作痒如蟲行用六味地黄丸料加山梔柴胡治之諸症悉愈一男子時瘡愈後遍身作痛服愈風丹半身不遂痰涎上湧夜間痛甚余作風容淫氣治以地黄丸而愈

一老人兩臂不遂語言蹇澁服祛風之藥筋攣骨痛此風藥虧損肝血益增其病也余用八珍湯補其氣血用

地黃丸補其腎水佐以愈風丹而愈

一婦人因怒吐痰胸滿作痛服四物二陳苓連枳殼之類不應更加祛風之劑半身不遂筋漸攣縮四肢痿軟日晡益甚內熱口乾形體倦怠余以為鬱怒傷脾肝氣血復損而然遂用逍遙散補中益氣湯六味地黃丸調治喜其謹疾年餘悉愈形體康健

一婦人脾胃虛弱飲食素少忽痰湧氣喘頭搖目劓手揚足擲難以候脉視其面色黃中見青此肝木乘脾土

金匱要略卷之八
一
用六君加柴胡升麻治之而甦更以補中益氣加半夏
調理而痊

一婦人懷抱鬱結筋攣骨痛喉間似有一核服烏藥順
氣散等藥口眼歪斜臂難伸舉痰涎愈甚內熱晡熱食
少體倦余以為鬱火傷脾血燥生風所致用加味歸脾
湯二十餘劑形體漸健飲食漸加又服加味逍遙散十
餘劑痰熱少退喉核少利更用升陽益胃湯數劑諸症
漸愈但臂不能伸此肝經血少用地黃丸而愈

一產婦筋攣臂軟肌肉掣動此氣血俱虛而有熱用十全大補湯而痊其後因怒而復作用加味逍遙散而愈
一產婦兩手麻木服愈風丹天麻丸遍身皆麻神思倦怠晡熱作渴自汗盜汗此氣血俱虛用十全大補加炮薑數劑諸症悉退却去炮薑又數劑而愈但有內熱用加味逍遙散數劑而痊

一男子善飲舌本強硬語言不清余曰此脾虛濕熱當用補中益氣加神麩麥芽乾葛澤瀉治之○一婦人善

怒舌本強手臂麻余曰舌本屬土被木尅制故耳當用
六君加柴胡芍藥治之○一男子舌下牽強手大指次
指不仁或大便秘結或皮膚赤暈余曰大腸之脉散舌
下此大腸血虛風熱當用逍遙散加槐角秦芫治之○
一男子足痿軟日晡熱余曰此足三陰虛當用六味滋
腎二丸補之○一婦人腿足無力勞則倦怠余曰四肢
者土也此屬脾虛當用補中益氣及還少丹主之俱不
從余言各執搜風天麻二丸并愈風丹而殞

飲食勞倦虧損元氣等症

二

進士王汝和因勞役失於調養忽然昏憤此元氣虛火
妄動挾痰而作急令灌童便神思漸爽更用參芪各五
錢芎歸各三錢玄參柴胡升麻炙草各一錢服之稍定
察其形倦甚又以十全大補湯加五味麥門治之而安
凡人元氣素弱或因起居失宜或因飲食勞倦或因用
心太過致遺精白濁自汗盜汗或內熱晡熱潮熱發熱
或口乾作渴喉痛舌裂或胸乳膨脹脇肋作痛或頭頸

時痛眩暈目花或心神不寧寤而不寐或小便赤澀莖中作痛或便溺餘滴臍腹陰冷或形容不充肢體畏寒或鼻氣急促或更有一切熱症皆是無根虛火但服前湯固其根本諸症自息若攻其風熱則悞矣

光祿高署丞脾胃素虛因飲食勞倦腹痛胸痞誤用大黃等藥下之譫語煩躁頭痛喘汗吐瀉頻頻時或昏憤脉大而無倫次用六君子加炮姜四劑而安但倦怠少食口乾發熱六脉浮數欲為瀉火之藥余曰不時發熱

是無火也脉浮大是血虛也此因胃虛五臟虧損虛症
發見服補胃之劑諸症悉退

大尹徐克明因飲食失宜日晡發熱口乾體倦小便赤
瀉兩腿酸痛余用補中益氣湯治之彼知醫自用四物
黃栢知母之劑反頭眩目赤耳鳴唇燥寒熱痰湧大便
熱痛小便赤瀉又用四物苓連枳實之類胸膈痞滿飲
食少思汗出如水再用二陳苓連黃栢知母麥門五味
言語謔妄兩手舉拂屢治反甚復求余用參芪各五錢

歸朮各三錢遠志茯神酸棗仁炙草各一錢服之熟睡
良久四劑稍安又用八珍湯調補而愈夫陰虛乃脾虛
也脾為至陰因脾虛而致前症蓋脾稟於胃故用甘溫
之劑以生發胃中元氣而除大熱胡乃反用苦寒復傷
脾血耶若前症果屬腎經陰虛亦因腎經陽虛不能生
陰耳經云無陽則陰無以生無陰則陽無以化又云虛
則補其母當用補中益氣六味地黄以補其母尤不宜
用苦寒之藥世以脾虛誤為腎虛輒用黃柏知母之類

反傷胃中生氣害人多矣大凡足三陰虛多因飲食勞
役以致腎不能生肝肝不能生火而害脾土不能滋化
但補脾土則金旺水生水得平而自相生矣

一男子每遇勞役食少胸痞發熱頭痛吐痰作渴脉浮
大余曰此脾胃血虛病也脾屬土為至陰而生血故曰
陰虛彼不信服二陳黃連枳實厚朴之類諸症益甚又
服四物黃柏知母麥門更腹痛作嘔脉洪數而無倫次
余先用六君加炮薑痛嘔漸愈又用補中益氣全痊

秀才劉貫卿勞役失宜飲食失節肢體倦怠發熱作渴
頭痛惡寒誤用人參敗毒散痰喘昏憤揚手擲足胸間
發癩如蚊所啞余用補中益氣加薑桂麥門五味補之
而愈

黃武選飲食勞倦發熱惡寒或用解表之藥益甚再劑
昏憤胸發黑癩脉洪數而無力余欲用補中益氣之劑
不從而歿

一儒者素勤苦因飲食失節大便下血或赤或黯半載

之後非便血則盜汗非惡寒則發熱血汗二藥用之無效六脉浮大心脾則濡此思傷心脾不能攝血歸源然血即汗汗即血其色赤黯便血盜汗皆火之升降微甚耳惡寒發熱氣血俱虛也乃午前用補中益氣以補脾肺之源舉下陷之氣午後用歸脾加麥門五味以補心脾之血收耗散之液不兩月而諸症悉愈

癸卯春人日余在下堡顧氏會間有儒者許梅村云舍親馬生者發熱煩渴時或頭痛昨服發散藥反加喘急

腹痛其汗如水晝夜譫語余意此勞傷元氣誤汗所致其腹必喜手按許徃詢之果然遂與十全大補加附子一錢服之熟睡喚而不醒舉家驚惶及覺諸症頓退再劑而痊凡人飲食勞役起居失宜見一切火症悉屬內真寒而外假熱故肚腹喜煖口畏冷物此乃形氣病氣俱屬不足法當純補元氣為善

一儒者日晡兩目緊澁不能瞻視此元氣下陷用補中益氣倍加參芪數劑全愈

一男子患症同前服黃栢知母之類目疾益甚更加便血此脾氣虛不能統血肝氣虛不能藏血用補中益氣六味地黃以補肝脾生腎水諸症漸愈

一男子飲食勞倦而發寒熱右手麻木或悞以為疔毒敷服皆寒涼敗毒腫脹重墜面色痿黃肢體倦怠六脉浮大按之如無此脾胃之氣虛也詢之果是銷銀匠因熱手入水梅銀寒凝隧道前藥益傷元氣故耳遂用補中益氣及溫和之藥煎湯漬手而愈

一儒者修左足傷其大指甲少許不見血不作痛形體如故後因飲食勞倦足重墜微腫痛或晝睡或夜寐其足如故誤服敗毒之劑寒熱腫痛蓋脾起於足大指此是脾氣虛弱下陷用十全大補湯而愈

余素性愛坐觀書久則倦怠必服補中益氣加麥門五味酒炒黑黃柏少許方覺精神清妥否則夜間少寐足內酸熱若再良久不寐腿內亦然且兼腿內筋似有抽縮意致兩腿左右頻移展轉不安必至倦極方寐此勞

傷元氣陰火乘虛下注丁酉五十一歲齒縫中有如物
塞作脹不安甚則口舌如有瘡然日晡益甚若睡良久
或服前藥始安至辛丑時五十有五晝間齒縫中作脹
服補中益氣一劑夜間得寐至壬寅有內艱之變日間
雖服前劑夜間齒縫亦脹每至午前諸齒并肢體方得
稍健午後仍脹觀此可知血氣日衰治法不同

脾胃虧損心腹作痛等症

三

唐儀部胸內作痛月餘腹亦痛左關弦長右關弦緊此

脾虛肝邪所乘以補中益氣加半夏木香二劑而愈又
用六君子湯二劑而安此面色黃中見青

儀部李北川常患腹痛每治以補中益氣加山梔即愈
一日因怒肚腹作痛胸脇作脹嘔吐不食肝脉弦緊此
脾氣虛弱肝火所乘仍用前湯吞左金丸一服而愈此
面色黃中見青兼赤

太守朱陽山因怒腹痛作瀉或兩脇作脹或胸乳作痛
或寒熱往來或小便不利飲食不入嘔吐痰涎神思不

清此肝木乘脾土用小柴胡加山梔炮姜茯苓陳皮製

黃連一劑即愈

製黃連即黃連吳茱萸等分用熱水拌
濕卷二三日同炒焦取連用后做此

陽山之內素善怒胸膈不利吐痰甚多吞酸噯腐飲食

少思手足發熱十餘年矣所服非苓連枳實必檳蘇厚

朴左關弦洪右關弦數此屬肝火血燥木乘土位朝用

六味地黃丸以滋養肝木夕用六君加當歸芍藥以調

補脾土不月而愈癸卯夏患背疽症屬虛寒用大溫補

之藥而愈乙巳夏因大怒吞酸噯腐胸腹脹滿余以他

往旬日或用二陳石膏治之吐涎如湧外熱如灼將用
滾痰丸下之余到診之脉洪大按之如無余曰此乃脾
胃虧損而發熱脾弱而涎泛出也余用六君加姜桂一
鍾即睡覺而諸症如失又數劑而康

儒者沈尼文內停飲食外感風寒頭痛發熱惡心腹痛
就治敝止余用人參養胃加芎芷麴藥香附桔梗一劑
而愈次日抵家前病仍作腹痛請治以手重按痛即止
此客寒乘虛而作也乃以香砂六君加木香炮姜服之

睡覺痛減六七去二香再服飲食少進又加黃芪當歸
少佐升麻而愈

府庠徐道夫母胃脘當心痛劇右寸關俱無左雖有微
而似絕手足厥冷病勢危篤察其色眼胞上下青黯此
脾虛肝木所勝用參朮茯苓陳皮甘草補其中氣用木
香和胃氣以行肝氣用吳茱萸散脾胃之寒止心腹之
痛急與一劑俟滾先服煎熟再進諸病悉愈向使泥其
痛無補法而反用攻伐之藥禍不旋踵

一婦人懷抱鬱結不時心腹作痛年餘不愈諸藥不應
余用歸脾加炒山梔而愈

脾腎虛寒陽氣脫陷等症

譚侍御但頭痛即吐清水不拘冬夏吃姜便止已三年
矣余作中氣虛寒用六君加當歸黃芪木香炮姜而瘥
一儒者四時喜極熱飲食或吞酸暖腐或大便不實足
指縫濕痒此脾氣虛寒下陷用六君加薑桂治之而愈
稍為失宜諸疾仍作用前藥更加附子錢許數劑不再

發

一男子形體倦怠飲食適可足指縫濕痒行坐久則重
墜此脾胃氣虛而下陷用補中益氣加茯苓半夏而愈
一男子胸腹脹滿手足逆冷飲食畏寒發熱吐痰時欲
作嘔嘗服清氣化痰及二陳枳實之類胸腹膨脹嘔吐
痰食小便淋漓又用四苓連栢知母車前小便不利諸
病益甚余曰此脾胃虛寒無火之症故食入不消而反
出遂用八味丸補火以生土用補中益氣加姜桂培養

中宮生發陽氣尋愈

一男子每勞肢體時痛或用清痰理氣之劑不勞常痛
加以導濕臂痛漫腫形體倦怠內熱盜汗脉浮大按之
微細此陽氣虛寒用補中益氣加附子一錢人參五錢
腫痛悉愈又以十全大補百餘劑而康彼計服過人參
一十三斤薑附各斤餘

大雅云家母年四十有二嘉靖壬寅七月患脾虛中滿
痰嗽發熱又因濕麵冷茶吞酸嘔吐絕食誤服苓連青

皮等藥益加寒熱口乾流涎不收且作渴聞食則嘔數日矣迎先生視之曰脾主涎此脾虛不能約制故涎自出也欲用人參安胃散惑於衆論以為胃經實火宿食治之病日增劇忽思冬瓜食如指甲一塊頓發嘔吐酸水不止仍服前藥愈劇復邀先生視之則神脫脉絕瀕死矣惟目睛尚動先生曰寒淫於內治以辛熱然藥不能下矣急用鹽艾附子炒熱熨臍腹以散寒回陽又以口氣補接母口之氣又以附子作餅熱貼臍間時許神

氣少甦以參朮附子為末仍以是藥加陳皮煎膏為丸如粟米大入五七粒於口隨津液嚥下即不嘔二日後加至十餘粒諸病少退甘涎不止五日後漸服煎劑一二匙胃氣少復乃思粥飲後投以參朮等藥溫補脾胃五十餘劑而愈大雅敢述病狀之奇用藥之神求附卷末一以見感恩之意一以示後之患者當取法於此云爾府學晚生長洲鑊潭沈大雅頓首拜書

命門火衰不能生土等症

五

廷評張汝翰胸膈作痞飲食難化服枳朮丸久而形體消瘦發熱口乾脉浮大而微用補中益氣加薑桂諸症悉退惟見脾胃虛寒遂用八味丸補命門火不月而飲食進三月而形體充此症若不用前丸多變腹脹喘促腿足浮腫小便淋漓等症急用濟生加減腎氣丸亦有得生者

一儒者雖盛暑喜燃火四肢常欲沸湯漬之面赤吐痰一似實火吐甚宿食亦出惟食椒薑之物方快余謂食

入反出乃脾胃虛寒用八味丸及十全大補加炮薑漸愈不月平復

一婦人飲食無過碗許非大便不實必吞酸噯腐或用二陳黃連更加內熱作嘔余謂東垣先生云邪熱不殺穀此脾胃虛弱末傳寒中以六君加炮薑木香數劑胃氣漸復飲食漸進又以補中益氣加炮薑木香茯苓半夏數劑全愈後怒飲食頓少元氣頓怯更加發熱誠似實火脉洪大而虛兩尺如無用益氣湯八味丸兩月餘

諸症悉愈

佐云向因失足剗然有聲坐立久則左足麻木雖夏月足寒如冰嘉靖己亥夏月因醉睡覺而飲水復睡遂覺右腹痞結以手摩之腹間漉漉有聲熱摩則氣泄而止每每加劇飲食稍多則作痛瀉求治於醫令服枳朮丸固守勿效甲辰歲求治於立齋先生診之喟然嘆曰此非脾胃病乃命門火衰不能生土虛寒使之然也若專主脾胃誤矣可服八味丸則愈予亦敬服果驗蓋八味

九有附子醫家罔敢輕用夫附子斬關奪旗回生起死
非良將莫能用立齋先生今之武侯也家貧不能報德
姑序此以記治驗嘉靖甲辰十二月望後二日杉墩介
庵朱佐頓首拜書

光祿鄺子溼面白神勞食少難化所服皆二陳山梔枳
實之類形體日瘦飲食日減余謂此脾土虛寒之症法
當補土之母彼不信乃徑補土以致不起

羅工部仲夏腹惡寒而外惡熱鼻吸氣而腹覺冷體畏

風而惡寒脉大而虛微每次進熱粥既許必兼食生薑
既許若粥離火食腹內即冷余曰熱之不熱是無火也
常用八味丸壯火之源以消陰翳彼反服四物玄參之
類而歿

工部陳禪亭發熱有痰服二陳黃連枳殼之類病益甚
甲辰季冬請治其脉左尺微細右關浮大重按微弱余
曰此命門火衰不能生土而脾病當補火以生土或可
愈也不悟仍服前藥脾土愈弱至乙巳閏正月病已革

復邀治右寸脉平脫此土不能生金生氣絕於內矣辭不治經云虛則補其母實則瀉其子凡病在子當補其母况病在母而屬不足反瀉其子不死何俟

辛丑年余在嘉興屠漸山第有林二守不時昏憤請余治之謔語不絕脉洪大按之如無此陽虛之症也當用參附湯治之有原醫者揚喜而迎曰先得我心之同然遂服之即靜睡覺而進食午後再劑神思如故其脉頓斂余返後又詐云用附子多矣吾以黃連解之陰仍用

參附湯竊觀仲景先生治傷寒云桂枝下咽陽盛乃斃
硝黃入胃陰盛乃亡不辯而自明矣吾恐前言致誤患
者故表而出之

腎虛火不歸經發熱等症

六

大尹沈用之不時發熱日飲水數碗寒藥一劑熱渴
益甚形體日瘦尺脉洪大而數時或無力王太僕曰熱
之不熱責其無火寒之不寒責其無水又云條熱往來
是無火也時作時止是無水也法當補腎用加減八味

九不月而愈

通安橋顧大有父年七十有九仲冬將出少妾入房致
頭痛發熱眩暈喘急痰涎壅盛小便頻數口乾引飲遍
舌生刺縮斂如荔枝然下唇黑裂面目俱赤煩躁不寐
或時喉間如煙火上衝急飲涼茶少解已瀕於死脉洪
大而無倫且有力捫其身烙手此腎經虛火遊行於外
投以十全大補加山茱澤瀉丹皮山藥麥門五味附子
一鍾熟寐良久脉症各減三四再與八味丸服之諸症

悉退後畏冷物而痊

下堡顧仁成年六十有一痢後入房精滑自遺二日方止又房勞感寒怒氣遂發寒熱右脇痛連心胸腹痞自汗盜汗如雨四肢厥冷睡中驚悸或覺上升如浮或覺下陷如墮遂致廢寢或用補藥二劑益甚脉浮大洪數按之微細此屬無火虛熱急與十全大補加山藥山茱丹皮附子一劑諸症頓愈而痊此等元氣百無一二

二顧

是父
子也

一儒者口乾發熱小便頻濁大便秘結盜汗夢遺遂致廢寢用當歸六黃湯二劑盜汗頓止用六味地黃丸二便調和用十全大補湯及前丸兼服月餘諸症悉愈州同韓用之年四十有六時仲夏色慾過度煩熱作渴飲水不絕小便淋瀝大便秘結唾痰如湧面目俱赤滿舌生刺兩唇燥裂遍身發熱或時如芒刺而無定處兩足心如烙以水折之作痛脉洪而無倫此腎陰虛陽無所附而發於外非火也蓋大熱而甚寒之不寒是無水

也當峻補其陰遂以加減八味丸料一斤內肉桂一兩以水頓煎六碗冰冷與飲半餉已用大半睡覺而食溫粥一碗復睡至晚乃以前藥溫飲一碗乃睡至曉食熱粥二碗諸症悉退翌日畏寒足冷至膝諸症仍至或以為傷寒余曰非也大寒而甚熱之不熱是無火也陽氣亦虛矣急以八味丸一劑服之稍緩四劑諸症復退大便至十三日不通以豬膽導之諸症復作急用十全大補湯數劑方應

舉人陳履賢色慾過度丁酉孟冬發熱無時飲水不絕遺精不止小便淋瀝或用四物芩連之類前症益甚更加痰涎上湧口舌生瘡服二陳黃栢知母之類胸膈不利飲食少思更加枳殼香附肚腹作脹大便不實脉浮大按之微細余朝用四君為主佐以熟地當歸夕用加減八味丸更以附子唾津調搽湧泉穴漸愈後用十全大補湯其大便不通小腹作脹此直腸乾澁令豬膽通之形體殊倦痰熱頓增急用獨參湯而安再用前藥而

愈但勞發熱無時其脉浮洪余謂其當慎起居否則難治彼以余言為迂至乙巳夏復作乃服四物黃柏知母而歿

吳江晚生沈察頓首

云

云僕年二十有六所稟虛弱兼

之勞心癸巳春發熱吐痰甲午冬為甚其熱時起於小腹吐痰而無定時治者謂脾經濕痰鬱火用苓連枳實二陳或專主心火用三黃丸之類至乙未冬其熱多起足心亦無定時吐痰不絕或遍身如芒刺然治者又以

為陰火生痰用四物二陳黃栢知母之類俱無驗丙申
夏痰熱愈甚盜汗作渴果屬痰火耶陰虛耶乞高明裁
示云余曰此症乃腎經虧損火不歸經當壯水之主
以鎮陽光乃就診於余果尺脉洪大餘卻虛浮遂用補
中益氣及六味地黃而愈後不守禁其脉復作余謂火
令可憂當慎調攝會試且緩但彼忽畧至戊戌夏果歿
於京

脾胃虧損吞酸噯腐等症

大司馬王浚川嘔吐宿滯臍腹痛甚手足俱冷脉微細
用附子理中丸一服益甚脉浮大按之而細用參附湯
一劑頓愈

趙吏部文卿患吐不止吐出皆酸味氣口脉大於人迎
二三倍速予投劑予曰此食鬱上宜吐不須用藥乃候
其吐清水無酸氣寸脉漸減尺脉漸復翌早吐止至午
脉俱平復勿藥自安後撫陝右過蘇顧訪傾蓋清談厚
過於昔且念余在林下類以言慰之

一儒者面色痿黃胸膈不利吞酸噯腐恪服理氣化痰之藥大便不實食少體倦此脾胃虛寒用六君加炮薑木香漸愈更兼用四神丸而元氣復此症若中氣虛弱者用人參理中湯或補中益氣加木香乾薑不應送左金丸或越鞠丸若中氣虛寒必加附子或附子理中湯無有不愈

一上舍飲食失宜胸腹膨脹噯氣吞酸以自知醫用二陳枳實黃連蒼朮黃栢之類前症益甚更加足指腫痛

指縫出水余用補中益氣加茯苓半夏治之而愈若腿足浮腫或焮腫寒熱嘔吐亦用前藥

儒者胡濟之場屋不利胸膈膨悶飲食無味服枳朮丸不時作嘔用二陳黃連枳實痰湧氣促加紫蘇枳殼喘嗽腹脹加厚朴腹皮小便不利加栝榔蓬朮泄瀉腹痛悉屬虛寒用六君加薑桂二劑不應更加附子一錢二劑稍退數劑十愈六七乃以八味丸全愈

一上舍嘔吐痰涎發熱作渴胸膈痞滿或用清氣化痰

降火前症益甚痰涎自出余曰嘔吐痰涎胃氣虛寒發熱作渴胃不生津胸膈痞滿脾氣虛弱須用參芪歸朮之類溫補脾胃生發陽氣諸病自退彼不信仍服前藥虛症悉至復請治余曰飲食不入吃逆不絕泄瀉腹痛手足逆冷是謂五虛煩熱作渴虛陽越於外也脉洪大脉欲絕也死期迫矣或曰若然殞於日乎夜乎余曰脉洪大當殞於晝果然

余母太宜人年六十有五己卯春二月飲食後偶聞外

言忤意嘔吐酸水內熱作渴飲食不進惟飲冷水氣口
脉大而無倫面色青赤此胃中濕熱鬱火投之以藥入
口即吐第三日吐酸物第七日吐酸黃水十一日吐苦
水脉益洪大仍喜冷水以黃連一味煎湯冷飲少許至
二十日加白朮白茯苓至二十五日加陳皮三十七日
加當歸炙甘草至六十日始進清米飲半盞漸進薄粥
飲調理得痊

一婦人吞酸噯腐嘔吐痰涎面色純白或用二陳黃連

枳實之類加發熱作渴肚腹脹滿余曰此脾胃虧損未
傳寒中不信仍作實治肢體腫脹如蠱余以六君加附
子木香治之胃氣漸醒飲食漸進虛火歸經又以補中
益氣加炮薑木香茯苓半夏兼服全愈

一婦人性沉靜多慮胸膈不利飲食少思腹脹吞酸面
色青黃用疎利之劑余曰此脾虛痞滿當益胃氣不信
仍用之胸膈果滿飲食愈少余以調中益氣加香砂炮
薑漸愈後以六君芎歸貝母桔梗炮薑而愈

仙云家母久患心腹疼痛每作必胸滿嘔吐厥逆面赤
唇麻咽乾舌燥寒熱不時而脉洪大衆以痰火治之屢
止屢作迨乙巳春發熱頗甚用藥反劇有朱存默氏謂
服寒涼藥所致欲用參朮等劑余疑痛無補法乃請立
齋先生以折中焉先生診而嘆曰此寒涼損真之故內
真寒而外假熱也且脉息弦洪而有怪狀乃脾氣虧損
肝脉乘之而然惟當溫補其胃遂與補中益氣加半夏
茯苓吳茱萸木香一服而效家母病發月餘竟夕不安今

熟寐徹曉洪脉頓斂怪脉頓除諸症釋然先生之見蓋有本歟家母餘齡皆先生所賜杏林報德沒齒不忘謹述此乞附醫案諒有太史者采入倉公諸篇以垂不朽將使後者觀省焉嘉靖乙巳春月吉日陳湖春生陸佃頓首謹書

一婦人年三十餘忽不進飲食日飲清茶三五碗并少用水果三年餘矣經行每次過期而少余以為脾氣鬱結用歸脾加吳茱不數劑而飲食如常若人脾腎虛而

不飲食當以四神丸治之

一婦人年踰二十不進飲食二年矣日飲清茶果品之類面部微黃浮腫形體如常仍能步履但體倦怠肝脾二脉弦浮按之微而結滯余用六君加木香吳茱下痰積甚多飲食頓進形體始瘦卧床月餘仍服六君之類而安

婦人患此見女科撮要

脾腎虧損停食泄瀉等症

進士劉華甫停食腹痛瀉黃吐痰服二陳山梔黃連枳實之類其症益甚左關弦緊右關弦長乃肝木尅脾土用六君加木香治之而愈若食已消而泄未已宜用異功散以補脾胃如不應用補中益氣升發陽氣凡泄利色黃脾土虧損真氣下陷必用前湯加木香肉蔻溫補如不應當補其母宜八味丸

先祿柴黼庵善飲泄瀉腹脹吐痰作嘔口乾此脾胃之氣虛先用六君加神麩痰嘔已止再用補中益氣加茯苓

苓半夏瀉脹亦愈此症若濕熱壅滯當用葛花解酲湯
分消其濕濕既去而瀉未已須用六君加神麩實脾土
化酒積然雖為酒而作實因脾土虛弱不可專主濕熱
舊條錢可久素善飲面赤痰盛大便不實此腸胃濕痰
壅滯用二陳苓連山梔枳實乾葛澤瀉升麻一劑吐痰
甚多大便始實此後日以黃連三錢泡湯飲之而安但
如此稟厚者不多耳

一儒者善飲便滑溺瀦食減胸滿腿足漸腫症屬脾腎

虛寒用加減金匱腎氣丸食進腫消更用八味丸胃強
脾健而愈

一男子清晨或五更吐痰或有酸味此是脾氣虛弱用
六君送四神丸而愈若脾氣鬱滯用二陳加桔梗山梔
送香連丸若鬱結傷脾用歸脾湯送香連丸若胸膈不
舒歸脾加柴胡山梔送左金丸若胃氣虛津液不能運
化用補中益氣送左金丸

一羽士停食泄瀉自用四苓黃連枳實麩藥益甚余曰

此脾腎泄也當用六君加薑桂送四神丸不信又用沉香化氣丸一服卧床不食咳則糞出幾至危殆終踐余言而愈蓋化氣之劑峻厲猛烈無經不傷無臟不損豈宜輕服

嘉靖乙未紹憲肝木克脾面赤生風大腸燥結炎火衝上久之遂致臟毒下血腸鳴澹泄腹脹喘急馴至絕穀瀕于殆矣諸醫方以枳實黃連之劑投之展轉增劇乃求治于立齋先生先生曰爾病脾腎兩虛內真寒而外

虛熱法當溫補遂以參朮為君山藥黃芪肉果薑附為
臣茱萸骨脂五味歸苓為佐治十劑俾以次服之諸醫
皆曰此火病也以火濟火可乎紹雅信先生不為動服
之決旬盡劑而血止諸疾遄已先是三年前先生過紹
謂曰爾面部赤風脾胃病也不治將深予心憂之而怠
緩以須疾發又惑於衆論幾至不救微先生吾其土矣
嗚呼先生之術亦神矣哉紹無以報盛德敬述梗槩求
附案末以為四方抱患者告庶用垂惠於無窮云長洲

朱紹

脾胃虧損停食痢疾等症

九

崔司空年踰六旬患痢赤白裏急後重此濕熱壅滯用芍藥湯內加大黃二錢一劑減半又劑全愈惟急重未止此脾氣下陷用補中益氣送香連丸而愈

羅給事小腹急痛大便欲去不去此脾腎氣虛而下陷也用補中益氣送八味丸二劑而愈此等症候因痢藥致損元氣肢體腫脹而死者不可枚舉少宗伯顧東江

停食患痢腹痛下墜或用疎導之劑兩足脹腫食少體倦煩熱作渴脉洪數按之微細余以六君加薑桂各二錢吳茱五味各一錢煎熟冷服之即睡覺而諸症頓退再劑全退此假熱而治以假寒也

太常邊華泉嘔吐不食腹痛後重自用大黃等藥一劑腹痛益甚自汗發熱昏憤脉大余用參朮各一兩炙甘草炮薑各三錢升麻一錢一鍾而甦又用補中益氣加炮薑二劑而愈

廷評曲汝為食後入房翌午腹痛去後似痢非痢次日
下皆膿血煩熱作渴神思昏倦用四神丸一服頓減又
用八味丸料加五味吳茱萸骨脂肉蔻二劑全愈

判官汪天錫年六十餘患痢腹痛後重熱渴引冷飲食
不進用芍藥湯內加大黃一兩四劑稍應仍用前藥大
黃或半數劑而愈此等元氣百無一二

通府薛允頰下血服犀角地黄湯等藥其血愈多形體
消瘦發熱少食裏急後重此脾氣下陷余用補中益氣

加炮薑一劑而愈

一上舍患痢後重自知醫用芍藥湯後重益甚飲食少思腹寒肢冷余以為脾胃虧損用六君加木香炮薑二劑而愈

一老人素以酒乳同飲去後似痢非痢胸膈不寬用痰痢等藥不效余思本草云酒不與乳同飲為得酸則凝結得苦則行散遂以茶茗為丸時用清茶送三五十九不數服而瘥

一老婦食後因怒患痢裏急後重屬脾氣下陷與大劑
六君加附子肉蔻煨木香各一錢吳茱五分骨脂五味
各一錢五分二劑諸症悉退惟小腹脹悶此肝氣滯於
脾也與調中益氣加附子木香五分四劑而愈後口內
覺鹹此腎虛水泛與六味地黄丸二劑頓愈

先母年八十仲夏患痢腹痛作嘔不食熱渴引湯手按
腹痛稍止脉鼓指而有力真氣虛而邪氣實也急用人
參五錢白朮茯苓各三錢陳皮升麻附子炙甘草各一

錢服之睡覺索食脉症頓退再劑而安此取症不取脉也凡暴病毋論其脉當從其症時石閣老太夫人其年歲脉症皆同彼乃專治其痢遂致不起

橫金陳梓園年六十面帶赤色吐痰口乾或時作瀉癸卯春就診謂余曰僕之症或以為脾經濕熱痰火作瀉率用二陳黃連枳實神麩麥芽白朮柴胡之類不應何也余脉之左關弦緊腎水不能生肝木也右關弦大肝木乘尅脾土也此乃脾腎虧損不能生尅制化當滋化

源不信余謂其甥朱太守陽山曰令舅不久當殞於痢
至甲辰夏果患痢而歿

產後痢疾見女科撮要

脾胃虧損瘧疾寒熱等症

十

冬官朱省庵停食感寒而患瘧自用清脾截瘧二藥食
後腹脹時或作痛服二陳黃連枳實之類小腹重墜腿
足浮腫加白朮山查吐食未化謂余曰何也余曰食後
脹痛乃脾虛不能尅化也小腹重墜乃脾虛不能升舉

也腿足浮腫乃脾虛不能運行也吐食不消乃脾胃虛寒無火也治以補中益氣加吳茱炮薑木香肉桂一劑諸症頓退飲食頓加不數劑而痊大凡停食之症宜用六君枳實厚朴若食已消而不愈用六君子湯若內傷外感用藿香正氣散若內傷多而外感少用人參養胃湯若勞傷元氣兼外感用補中益氣加川芎若勞傷元氣兼停食補中益氣加神麴陳皮若氣惱兼食用六君加香附山梔若嚙酸或食後口酸當節飲食病作時大

熱躁渴以薑湯乘熱飲之此截瘧之良法也每見發時
飲啖生冷物者病或少愈多致脾虛胃損往往不治大
抵內傷飲食者必惡食外感風寒者不惡食審係勞傷
元氣雖有百症但用補中益氣湯其病自愈其屬外感
者主以補養佐以解散其邪自退若外邪既退即補中
益氣以實其表若邪去而不實其表或過用發表虧損
脾胃皆致綿延難治凡此不問陰陽日夜所發皆宜補
中益氣此不截之截也夫人以脾胃為主未有脾胃實

而患瘧痢者若專主發表攻裏降火導痰是治其末而忘其本前所云乃瘧之大畧如不應當分六經表裏而治之說見各方

大尹曹時用患瘧寒熱用止截之劑反發熱惡寒飲食少思神思甚倦其脉或浮洪或微細此陽氣虛寒余用補中益氣內參芪歸朮各加三錢甘草一錢五分加炮薑附子各一錢一劑而寒熱止數劑而元氣復

一儒者秋患寒熱至春未愈胸痞腹脹余用人參二兩

生薑二兩煨熟煎頓服寒熱即止更以調中益氣加半
茯苓炮薑數劑元氣頓復後任縣尹每飲食勞倦疾
作服前藥即愈大凡久瘧乃至元氣虛寒益氣虛則寒
血虛則熱胃虛則惡寒脾虛則發熱陰火下流則寒熱
交作或吐涎不食泄瀉腹痛手足逆冷寒戰如慄若誤
投以清脾截瘧二飲多致不起

一上舍每至夏秋非停食作瀉必瘧痢霍亂遇勞吐痰
頭眩體倦發熱惡寒用四物二陳苓連枳實山梔之類

患瘡服止截之藥前症益甚時或遍身如芒刺然余以
補中益氣加茯苓半夏內參芪各用三錢歸朮各二錢
十餘劑少愈若間斷其藥諸病仍至連服三十餘劑全
愈又服還少丹半載形體充實

一婦人瘡久不愈發後口乾倦甚用七味白朮散加麥
門五味作大劑煎與恣飲再發稍可乃用補中益氣加
茯苓半夏十餘劑而愈凡截瘡余常以參朮各一兩生
薑四兩煨熟煎服即止或以大劑補中益氣加煨薑尤

效生薑一味亦效

東洞庭馬志卿瘧後形體骨立發熱惡寒食少體倦用
補中益氣內參芪歸朮各加三錢甘草一錢五分炮薑
二錢一劑而寒熱止數劑而元氣復

一婦人久患寒熱服清脾飲之類胸膈飽脹飲食減少
余用調中益氣加茯苓半夏炮薑各一錢二劑而痊

一婦人勞役停食患瘧或用消導止截飲食少思體瘦
腹脹余以補中益氣倍用參芪歸朮甘草加茯苓半夏

各一錢五分炮薑五錢一劑頓安又以前藥炮薑用一錢不數劑元氣復而全愈

產後瘧疾見女科撮要

脾肺虧損咳嗽痰喘等症

十一

大參李北泉時唾痰涎內熱作渴肢體倦怠勞而足熱用清氣化痰益甚余曰此腎水泛而為痰法當補腎不信另進滾痰丸一服吐瀉不止飲食不入頭暈眼閉始信余用六君子湯數劑胃氣漸復卻用六味丸月餘諸

症悉愈

鴻臚蘇龍溪咳嗽氣喘鼻塞流涕余用參蘇飲一劑以散寒邪更用補中益氣湯以實腠理而愈後因勞怒仍作自用前飲益甚加黃連枳實腹脹不食小便短少服二陳四苓前症愈劇小便不通余曰腹脹不食脾胃虛也小便短少肺腎虛也悉因攻伐所致投以六君加黃芪炮薑五味二劑諸症頓退再用補中益氣加炮薑五味數劑全愈

地官李北川每勞咳嗽余用補中益氣湯即愈一日復作自用參蘇飲益甚更服人參敗毒散項強口噤腰背反張余曰此誤汗亡津液而變瘥矣仍以前湯加附子一錢四劑而瘥感冒咳嗽若誤行發汗過多喘促呼吸不利吐痰不止必患肺癰矣

侍御譚希曾咳嗽吐痰手足時冷余以為脾肺虛寒用補中益氣加炮薑而愈

職方王用之喘嗽作渴面赤鼻乾余以為脾肺有熱用

二陳加苓連山梔桔梗麥門而愈

僉憲阮君聘咳嗽面白鼻流清涕此脾肺虛而兼外邪用補中益氣加茯苓半夏五味治之而愈又用六君芎歸之類而安

司廳陳國華素陰虛患咳嗽以自知醫用發表化痰之劑不應用清熱化痰等藥其症愈甚余曰此脾肺虛也不信用牛黃清心丸更加胸腹作脹飲食少思足三陰虛症悉見朝用六君桔梗升麻麥門五味補脾土以生

肺金夕用八味丸補命門火以生脾土諸症漸愈經云不能治其虛安問其餘此脾上虛不能生肺金而金病復用前藥而反瀉其火吾不得而知也

中書鮑希伏素陰虛患咳嗽服清氣化痰丸及二陳苓連之類痰益甚用四物黃栢知母玄參之類腹脹咽啞右關脉浮弦左尺脉洪大余曰脾土既不能生肺金陰火又從而剋之當滋化源朝用補中益氣加山茱麥門五味夕用六味地黃加五味子三月餘喜其慎疾得愈

武選汪用之飲食起居失宜咳嗽吐痰用化痰發散之藥時仲夏脉洪數而無力胸滿而赤吐痰腥臭汗出不止余曰水泛為痰之症而用前劑是謂重亡津液得非肺癰乎不信仍服前藥翌日果吐膿脉數左三右寸為甚始信用桔梗湯一劑膿數頓止再劑全止面色頓白仍於憂惶余曰此症面白脉濡不治自愈又用前藥一劑佐以六味丸治之而痊

錦衣李大用素不慎起居吐痰自汗咳嗽發熱服二陳

苓連枳殼山梔之類前症不減飲食少思用四物二陳
苓連黃栢知母玄參之類前症愈甚更加胸腹不利飲
食益少內熱晡熱加桑皮紫蘇杏仁紫苑桔梗之類胸
膈膨脹小便短少用猪苓澤瀉白朮茯苓枳殼青皮半
夏黃連蘇子胸膈痞滿脇肋膨脹小便不通加茵陳葶
藶喘促不卧飲食不進余診之六脉洪數肺腎二部尤
甚余曰脾土既不能生肺金而心火又乘之此肺癰之
作也當滋化源緩則不救不信後唾膿痰復求治余曰

胸膈痞滿脾土敗也喘促不卧肺金敗也小便不通腎水敗也脇肋膨脹肝木敗也飲食不化心火敗也此化源既絕五臟已敗然藥豈能生耶已而果然

絲客姚荃者素鬱怒年近六十脾胃不健服香燥行氣飲食少思兩脇脹悶服行氣破血飲食不入右脇脹痛喜用手按彼疑為膈氣痰飲內傷余曰乃肝木尅脾土而脾土不能生肺金也若內有瘀血雖單衣亦不敢着肉用滋化源之藥四劑諸症頓退彼以為愈余曰火令

在適當補脾土以保肺金彼不信後復作另用痰火之劑益甚求治左關右寸滑數此肺內潰矣仍不信乃服前藥果吐穢膿而歿

學士吳北川過飲痰壅舌本強硬服降火化痰藥痰氣益甚肢體不遂余作脾虛濕熱治之而愈

上舍史瞻之每至春咳嗽用參蘇飲加芩連桑杏乃愈乙巳春患之用前藥益甚更加喉痞就治左尺洪數而無力余曰此是腎經陰火刑尅肺金當滋化源遂以六

味丸料加麥門五味炒梔及補中益氣湯而愈

儒者張克明咳嗽用二陳苓連枳殼胸滿氣喘侵晨吐痰加蘇子杏仁口出痰涎口乾作渴余曰侵晨吐痰脾虛不能消化飲食胸滿氣喘脾虛不能生肺金涎沫自出脾虛不能收攝口乾作渴脾虛不能生津液遂用六君加炮薑肉果溫補脾胃更用八味丸以補土母而愈一男子夏月吐痰或嗽用胃火藥不應余以為火乘肺金用麥門冬湯而愈後因勞復嗽用補中益氣加桔梗

山梔片芩麥門五味而愈但口乾體倦小便赤瀆日生脉散而痊若咳而屬胃火有痰宜竹葉石膏湯胃氣虛宜補中益氣加貝母桔梗若陰火上衝宜生脉散送地黃丸以保肺氣生腎水此乃真臟之患非滋化源決不能愈

一婦人患咳嗽脇痛發熱日晡益甚用加味逍遙散熟地治之而愈年餘因怒氣勞役前症仍作又太陽痛或寒熱往來或咳嗽遺尿皆屬肝火血虛陰挺痿痺用前

散及地黃丸月餘而瘥

表弟婦咳嗽發熱嘔吐痰涎日夜約五六碗喘嗽不寧
胸痞躁渴飲食不進崩血如湧此命門火衰脾土虛寒
用八味丸及附子理中湯加減治之而愈

詳見婦人血崩

一婦人不得於姑患咳胸膈不利飲食無味此脾肺俱
傷痰鬱於中先用歸脾湯加山梔撫芎貝母桔梗諸症
漸愈後以六君加芎歸桔梗間服全愈

一婦人咳嗽早間吐痰甚多夜間喘急不寐余謂早間

多痰乃脾虛飲食所化夜間喘急乃肺虛陰火上衝遂用補中益氣加麥門五味而愈

一婦人飲食後因怒患瘧嘔吐用藿香正氣散二劑而愈後復怒吐痰甚多狂言熱熾胸脇脹痛手按少止脉洪大無倫按之微細此屬肝脾二經血虛以加味逍遙散加熟地川芎二劑脉症頓退再用十全大補而安此症若用疎通之劑是犯虛虛之戒矣

上舍陳道復長子虧損腎經久患咳嗽午後益甚余曰

當補脾土滋化源使金水自能相生時孟春不信乃服
黃栢知母之類至夏吐痰引飲小便頻數面目如緋余
以白朮當歸茯苓陳皮麥門五味丹皮澤瀉四劑乃以
參芪熟地山茱為丸俾服之諸症頓退復請視余以為
信遂用前藥如常與之彼仍泥不服卒致不起

產後咳嗽見女科撮要

各症方藥 十二

四物湯 治肝脾腎血虛發熱或日晡熱甚頭目不清

或煩躁不寐胸膈作脹或脇作痛宜用此湯若脾氣虛而不能生血宜用四君子湯若脾氣鬱而虛宜用歸脾湯若腎水涸而不能生肝血宜用六味丸

當歸

三錢

熟地黃

三錢

芍藥

二錢

川芎

一錢

五分

右水煎服

加味四物湯即前方加白朮茯苓柴胡丹皮

四君子湯 治脾胃虛弱飲食少進或肢體腫脹肚腹作痛或大便不實體瘦面黃或胸膈虛痞痰嗽吞酸

若因脾胃虛寒而致宜香砂六君子若因脾經鬱結而致宜歸脾湯若因肝木侮脾胃而致宜用六君加木香芍藥若命門火虛而致宜用八味丸

人參 白朮

茯苓

各二錢

甘草

炙一錢

右薑棗水煎服

異功散 治久咳不已或腹滿少食或面腫氣逆又治脾胃虛弱飲食少思等症即前方加陳皮

六君子湯即四君子加半夏陳皮 治脾胃虛弱飲食

少思或久患瘧痢若見內熱或飲食難化作酸乃屬
虛火須加炮薑其功甚速

香砂六君子湯即前方加香附藿香砂仁

人參理中湯 治脾胃虛弱飲食少思或去後無度或
嘔吐腹痛或飲食難化胸膈不利或瘧疾中氣虛損
久不能愈或中氣虛弱痰氣不利口舌生瘡加附子
名附子理中湯治中氣虛寒而患前症又治入房腹
痛手足逆冷或犯寒氣或食冷物

人參 白朮 乾薑

炮

甘草

炙各等分

右每服五七錢或一兩水煎服

附子理中湯 治脾胃虛寒手足厥冷飲食不入或腸鳴切痛嘔逆吐瀉即前方加附子等分照前服

八珍湯 治氣血虛弱惡寒發熱煩躁作渴或不時寒熱眩暈昏憤或大便不實小便赤淋或飲食少思小腹脹痛等症即四物四君合方

十全大補湯 即八珍加黃芪肉桂治症同前又治遺

精白濁自汗盜汗或內熱晡熱潮熱發熱或口乾作渴喉痛舌裂或胸乳膨脹脇肋作痛或臍腹陰冷便溺餘滴或頭頸時痛眩暈目花或心神不寧寤而不寐或形容不充肢體作痛或鼻吸氣冷急趨氣促此皆是無根虛火但服此藥諸症悉退

人參養榮湯 治脾肺俱虛發熱惡寒四肢倦怠肌肉消瘦面黃短氣食少作瀉若氣血虛而變見諸症莫能名狀勿論其病勿論其脉但用此湯其病悉退

白芍藥

錢半

人參

陳皮

黃芪

蜜炙

桂心

當歸

白朮

甘草

炙各一錢

熟地黄

五味子

炒

茯苓

各七分半

遠志

五分

右薑棗水煎服

當歸補血湯

治氣血俱虛肌熱惡寒面目赤色煩渴

引飲脉洪大而虛重按似無此脉虛血虛也此病多有得於饑飽勞役者

黃芪

炙一兩

當歸

二錢酒製

右水煎服

當歸六黃湯

當歸

黃芪

炒

生地黃

熟地黃

各一錢

黃芩

黃

連

黃栢

各炒焦五分

獨參湯

治一切失血惡寒發熱作渴煩躁蓋血生於

氣故血脫補氣陽生陰長之理也

人參

二兩

右棗十枚水煎服

歸脾湯 治思慮傷脾不能攝血致血妄行或健忘怔
忡驚悸盜汗或心脾作痛嗜卧少食大便不調或肢
體重痛月經不調赤白帶下或思慮傷脾而患瘡痢

人參 白朮 白茯苓 龍眼肉 酸棗仁 黃

芪 各二錢 遠志 當歸 各一錢 木香 甘草 各五分

右薑棗水煎服

加味歸脾湯即前方加柴胡山梔

加減八味丸 治腎水不足虛火上炎發熱作渴口舌

生瘡或牙齦潰爛咽喉作痛或形體憔悴寢汗發熱
五臟齊損即六味丸加肉桂一兩

六味丸

一名地黃丸
一名腎氣丸

治腎經不足發熱作渴小便淋

秘氣壅痰嗽頭目眩暈眼花耳聾咽燥舌痛齒牙不
固腰腿痿軟自汗盜汗便血諸血失音水泛為痰血
虛發熱等症其功不能盡述

熟地黃

八兩
作膏

山茱萸肉

乾山藥

各四兩

牡丹皮

白茯苓

澤瀉

各三兩

右各另為末和地黃加煉蜜丸桐子大每服七八十丸空心食前滾湯下

八味丸 治命門火衰不能生土以致脾胃虛寒飲食少思大便不實臍腹疼痛夜多漩溺等症即六味丸加肉桂附子各一兩

補中益氣湯 治中風虛弱四肢倦怠口乾發熱飲食無味或飲食失節勞倦身熱脉洪大無力或頭痛惡寒自汗或氣高而喘身熱而煩脉微細軟弱自汗體

倦少食或氣虛不能攝血或飲食勞役而患瘧痢等
症因脾胃虛而久不能愈或元氣虛弱感冒風寒不
勝發表宜用此代之若病後脾胃久虛四臟不能相
生或洒淅惡寒情慘慘不樂目慌慌不明陽氣鬱遏
者急加附子以回陽

黃芪

炙一錢五分

甘草

炙

人參

當歸

酒拌

白朮

炒各一錢升

麻


柴胡

各三分

陳皮

一錢

餘方見下卷



欽定四庫全書

詩
一
氏
醫
卷

五
三

薛氏醫案卷一

欽定四庫全書

子部

薛氏醫案卷二

詳校官太醫院吏目臣周世泰

編修臣倉聖脈覆勛

總校官原任中允臣王燕緒

校對官中書臣李斯咏

謄錄舉人臣薛炳文

欽定四庫全書

薛氏醫案卷二

明 薛己 撰

內科摘要

脾腎虧損頭眩痰氣等症

閣老梁厚齋氣短有痰小便赤瀦足跟作痛尺脉浮大按之則瀦此腎虛而痰飲也用四物送六味丸不月而康仲景先生云氣虛有飲用腎氣丸補而逐之誠開後

金匱要略卷之二十一
卷二
學之矇瞶濟無窮之天枉腎氣丸即六味也

都憲孟有涯氣短痰暈服辛香之劑痰盛遺尿兩尺浮
大按之如無余以為腎家不能納氣歸源香燥致甚耳
用八味丸料三劑而愈

孫都憲形體豐厚勞神善怒面帶陽色口渴吐痰或頭
目眩暈或熱從腹起左三脉洪而有力右三脉洪而無
力余謂足三陰虧損用補中益氣加麥門五味及加減
八味丸而愈若人少有老態不耐寒暑不勝勞役四時

迭病皆因少時氣血方長而勞心虧損或精血未滿而御女過傷故其見症難以悉狀此精氣不足但滋化源其病自痊又若飲食勞役七情失宜以致諸症亦當治以前法設或六淫所侵而致諸症亦因真氣內虛而外邪乘襲尤當固胃氣為主蓋胃為五臟之根本故黃柏知母不宜輕用恐復傷胃氣也大凡雜症屬內因乃形氣病氣俱不足當補不當瀉傷寒雖屬外因亦宜分其表裡虛實治當審之

昌平守王天成頭暈惡寒形體倦怠得食稍愈勞而益甚寸關脉浮大此脾肺虛弱用補中益氣加蔓荊子而愈後因勞役發熱惡寒謔言不寐得食稍安用補中益氣湯而痊

大尹祝支山因怒頭暈拗內筋攣時或寒熱日晡熱甚此肝火筋攣氣虛頭暈用八珍加柴胡山梔牡丹皮二十餘劑而愈

上舍顧桐石會飲於周上舍第問余曰向孟有涯陳東

谷俱為無嗣納寵已而得疾皆頭暈吐痰並用蘇合香
丸惟有涯得生何也余曰二症因腎虛不能納氣而為
頭暈不能制水而為痰涎東谷專主攻痰行氣有涯專
於益火補益故耳後余應杭人之請桐石房勞過度亦
患前症或用清氣化痰愈甚顧曰我病是腎虛不能納
氣歸源治者不悟而歿惜哉

一男子素厚味胸滿痰盛余曰膏粱之人內多積熱與
法製清氣化痰丸而愈彼為有驗修合餽送脾胃虛者

無不受害

先兄體貌豐偉唾痰甚多脉洪有力殊不耐勞遇風頭
暈欲仆口舌破裂或至赤爛誤食薑蒜少許口瘡益甚
服八味丸及補中益氣加附子錢許即愈停藥月餘諸
症仍作此命門虛火不歸源也

肝腎虧損血燥結核等症

儒者楊澤之性躁嗜色缺盆結一核此肝火血燥筋攣
法當滋腎水生肝血不信乃內服降火化痰外敷南星

商陸轉大如碗余用補中益氣及六味地黃間以蘆薈
九年餘元氣漸復而腫消

一男子素善怒左項微腫漸大如升用清痰理氣而大
熱作渴小便頻濁余謂腎水虧損用六味地黃補中益
氣而愈亦有胸脇等處大如升斗或破而如菌如榴不
問大小俱治以前法

一男子頸間結核大潰年餘一男子眉間一核初如豆
粒二年漸大如桃悉用清肝火養肝血益元氣而愈

金匱要略卷之八
卷二
舉人江節夫頸臂脇肋各結一核恪服祛痰降火軟堅
之劑益甚余曰此肝膽經血少而火燥也彼執前藥至
明年六月各核皆潰脉浮大而瀯余斷以秋金將旺肝
木被尅必不起後果然

脾腎虧損小便不利肚腹膨脹等症

三

大尹劉天錫內有濕熱大便滑利小便瀯滯服淡滲之
劑愈加滴瀝小腹腿膝皆腫兩眼脹痛此腎虛熱在下
焦淡滲導損陽氣陰無以化遂用地黃滋腎二九小便

如故更以補中益氣加麥門五味兼服而愈

州守王用之先因肚腹膨脹飲食少思服二陳枳實之類小便不利大便不實咳痰腹脹用淡滲破氣之劑手足俱冷此足三陰虛寒之症也用金匱腎氣丸不月而康

州同劉禹功素不慎起居七情以致飲食不甘胸膈不利用消導順氣肚腹痞悶吐痰氣逆用化痰降火食少泄瀉小腹作脹用分利降火小便瀦滯氣喘痰湧服清

氣化痰丸小便愈滯大便愈瀉肚腹脹大肚臍突出不能寢卧六脉微細左寸虛甚右寸短促此命門火衰脾腎虛寒之危症也先用金匱加減腎氣丸料內桂附各一錢五分二劑下瘀穢甚多又以補中益氣送二神丸二劑諸症悉退五六又用前藥數劑并附子之類貼腰臍及湧泉穴寸脉漸復而安後因怒腹悶惑於人言服沉香化氣丸大便下血諸症悉至余曰此陰絡傷也辭不治果歿

一富商飲食起居失宜大便乾結常服潤腸等丸後胸腹不利飲食不甘口乾體倦發熱吐痰服二陳黃連之類前症益甚小便滴瀝大便泄瀉腹脹少食服五苓藿麥之類小便不通體腫喘嗽用金匱腎氣丸補中益氣湯而愈

一儒者失於調養飲食難化胸膈不利或用行氣消導藥咳嗽喘促服行氣化痰藥肚腹漸脹服行氣分利藥睡卧不能兩足浮腫小便不利大便不實脉浮大按之

微細兩寸皆短此脾腎虧損朝用補中益氣加薑附夕
用金匱腎氣加骨脂肉果各數劑諸症漸愈再佐以八
味丸兩月乃能步履却服補中八味半載而康

一男子素不善調攝唾痰口乾飲食不美服化痰行氣
之劑胸滿腹膨痰涎愈盛服導痰理脾之劑肚腹膨脹
二便不利服分氣利水之劑腹大脇痛睡卧不得服破
血消導之劑兩足皆腫脉浮大不及於寸口朝用金匱
加減腎氣丸夕用補中益氣湯煎送前九月餘諸症漸

退飲食漸進再用八味丸補中湯月餘自能轉側又兩月而能步履卻服大補湯還少丹又半載而康後稍失調理其腹仍脹服前藥即愈

一男子患前症余為壯火補土漸愈彼欲速服攻積之劑下血甚多余診之曰此陰絡傷故血內溢非所宜也後果歿

一男子胸膈痞悶專服破氣之藥余曰此血虛病也血生於脾上若服前藥脾氣弱而血愈虛矣不信又用內

傷之藥反吐血余曰此陽絡傷也後果然

大方世家湖鄉離羣索居山妻趙氏忽嬰痰熱治者多以寒涼偶得小愈三四年餘屢進屢退于是元氣消爍庚子夏遍身浮腫手足麻冷日夜咳嗽煩躁引飲小水不利大肉盡去勢將危殆幸遇先生診之脉洪大而無倫按之如無此虛熱無火法當壯火之源以生脾土與金匱腎氣丸料服之頓覺小水潰決如泉俾日服前丸及大補之藥二十餘劑而愈三四年間平康無恙迄今甲

辰仲春悲哀動中前症復作體如焚燎口肉盡腐胸腹
腫滿食不下咽者四日夫婦相顧束手待斃而已又承
先生視之投以八味丸二服神思清爽服金匱腎氣丸
料加參芪歸朮未竟夕而胸次漸舒陡然思食不三日
而病去五六矣嗣後日用前二丸間服逾日而起至秋
初復患痢又服金匱腎氣丸料加參芪歸朮黃連吳茱
朮香痢遂止但覺後重又用補中益氣加木香黃連吳
茱五味數劑而全愈大方自分寒素命亦蹇剝山妻抱

病沉痾本難調攝苟非先生援救填壑未免今不肖奔走衣食於外而可無內顧之憂矣然則先生之仁庇固不肖全家之福亦不肖全家之感也斯言也當置之座右以為子孫世誦之不肖嘗侍先生之側檢閱醫案始知山妻奏效巔末遂秉書紀二九藥之聖且彰先生用藥之神萬一云吳門晚學生沈大方履文再拜頓首謹書

脾胃虧損暑濕所傷等症

四附 倉生冷入房

大司徒李蒲汀南吏部少宰時患黃疸常用淡滲之劑
公尚無嗣猶豫不決余曰有是病而用是藥以茵陳五
苓散加苓連山梔二劑而愈至辛卯得子公執余手而
笑曰醫方猶公案先設君避毀譽殘喘安得享餘年而
遂付託之望哉由是禮遇益厚

應天王治中遍身發黃妄言如狂苦于胸痛手不可近
此中焦畜血為患用桃仁承氣湯一劑下瘀血而愈
太守朱陽山弟下部蓄血發狂用抵當湯而愈

一儒者每春夏口乾發熱勞則頭痛服清涼化痰藥瀉喘煩躁用香茹飲神思昏憤脉大而虛此因閉藏之際不遠幃幕為患名曰注夏用補中益氣去柴胡升麻加五味麥門炮薑一劑脉益甚仍用前藥加肉桂五分服之即甦更用六味丸而痊

一儒者體肥善飲仲秋痰喘用二陳苓連益甚加桑皮杏仁盜汗氣促加貝母枳殼不時發熱余以為脾肺虛寒用八味丸以補土母補中益氣以接中氣而愈

一男子夏月入房食水果腹痛余用附子理中湯而愈
有同患此者不信別用二陳苓連之類而死

一男子盛暑發熱胸背作痛飲湯自汗用發表之藥昏
憤譫語大便不實吐痰甚多用十全大補一劑頓退又
用補中益氣加炮薑二劑全愈

肝脾腎虧損頭目耳鼻等症

五

給事張禹功目亦不明服祛風散熱藥反畏明重聽脉
大而虛此因勞心過度飲食失節以補中益氣加茯神

棗仁山藥山茱五味頓愈又勞役復甚用十全大補兼以前藥漸愈却用補中益氣加前藥而痊東垣云諸經脉絡皆走於面而行空竅其清氣散於目而為精走於耳而為聽若心煩事冗飲食失節脾胃虧損心火太甚百脉沸騰邪害孔竅而失明矣况脾為諸陰之首目為血脉之宗脾虛則五臟之精氣皆為失所若不理脾胃不養神血乃治標而不治本也

少宰李蒲汀耳如蟬鳴服四物湯耳鳴益甚此元氣虧

損之症五更服六味地黄丸食前服補中益氣湯頓愈
此症若血虛而有火用八珍加山梔柴胡氣虛而有火
四君加山梔柴胡若因怒就聾或鳴實用小柴胡加芎
歸山梔虛用補中益氣加山梔午前甚用四物加白朮
茯苓久瀕用補中益氣午後甚用地黃丸

少司馬黎仰之南銀臺時因怒耳鳴吐痰作嘔不食寒
熱脇痛用小柴胡合四物加山梔陳皮而瘥尚寶劉毅
齋怒則太陽作痛用小柴胡加茯苓山梔以清肝火更

用六味丸以生腎水後不再發

一儒者日晡兩目緊澁不能瞻視此元氣下陷用補中益氣倍加參芪數劑全愈

一男子亦患前症服黃柏知母之類更加便血此脾虛不能統血肝虛不能藏血也用補中益氣六味地黃而愈

一儒者兩目作痛服降火祛風之藥兩目如緋熱倦殊甚余用十全大補湯數劑諸症悉退服補中益氣兼六

味丸而愈復因勞役午後目濇體倦服十全大補而痊
一男子房勞兼怒風府脹悶兩脇脹痛余作色慾損腎
怒氣傷肝用六味地黄丸料加白朮當歸一劑而安
一儒者酒色過度頭腦兩脇作痛余以為腎虛而肝病
亦用前藥頓安

一男子面白鼻涕不聞馨穢三年矣用補中益氣
加麥門山梔而愈

一男子年二十素嗜酒色兩目赤痛或作或止兩尺洪

大按之微弱余謂少年得此目當失明翌早索途而行
不辨天日衆皆驚異余與六味地黄丸料加麥門五味
一劑頓明

婦人症見女科撮要

脾肺腎虧損小便自遺淋瀝等症

六

大司徒許函谷在南銀臺時因勞發熱小便自遺或時
不利余作肝火陰挺不能約制午前用補中益氣加山
藥黃栢知母午後服地黄丸月餘諸症悉退此症若服

燥劑而頻數或不利用四物麥門五味甘草若數而黃
用四物加山茱黃栢知母五味麥門若肺虛而短少用
補中益氣加山藥麥門若陰挺痿痺而頻數用地黃丸
若熱結膀胱而不利用五淋散若脾肺燥不能化生用
黃芩清肺飲若膀胱陰虛陽無以生而淋瀝用滋腎丸
若膀胱陽虛陰無以化而淋瀝用六味丸若轉筋小便
不通或喘急欲死不問男女孕婦急用八味丸緩則不
救若老人陰痿思色精不出而內敗小便道澀痛如淋

用加減八味丸料加車前牛膝若老人精已竭而後耗
之大小便道牽痛愈痛愈欲便愈便則愈痛亦治以前
藥不應急加附子若喘嗽吐痰腿足冷腫腰骨大痛而
目浮腫太陽作痛亦治以前藥若痛愈而小便仍瀉宜
用加減八味丸以緩治之

詳見褚氏遺書精
血篇但無治法耳

司徒邊華泉小便頻數瀉滯短赤口乾唾痰此腎經陽
虛熱燥陰無以化用六味滋腎二丸而愈

司馬李悟山莖中作痛小便如淋口乾唾痰此思色精

降而內敗用補中益氣六味地黃而愈

考功楊村庵口舌乾燥小便頻數此膀胱陽燥陰虛先用滋腎丸以補陰而小便愈再用補中益氣六味地黃以補肺腎而安若汗多而小便短少或體不禁寒乃脾肺氣虛也

司空何燕泉小便赤短體倦食少缺盆作痛此脾肺虛弱不能生腎水當滋化源用補中益氣六味丸加五味而安

商主客素膏梁小便赤數口乾作渴吐痰稠粘右寸關數而有力此脾肺積熱遺於膀胱用黃芩清肺飲調理脾肺用滋腎六味二九滋補腎水而愈

一儒者發熱無時飲水不絕每登廁小便瀉痛大便牽痛此精竭復耗所致用六味丸加五味子及補中益氣喜其謹守得愈若肢體畏寒喜熱飲食用八味丸

儒者楊文魁痢後兩足浮腫胸腹脹滿小便短少用分利之劑遍身腫兼氣喘余曰兩足浮腫脾氣下陷也胸

腹脹滿脾虛作痞也小便短少肺不能生腎也身腫氣喘脾不能生肺也用補中益氣湯加附子而愈半載後因飲食勞倦兩目浮腫小便短少仍服前藥頓愈

甲戌年七月余奉侍武廟湯藥勞役過甚飲食失節復兼怒氣次年春莖中作痒時出白津時或痛甚急以手緊捻纔止此肝脾之氣虛也服地黃丸及補中益氣加黃栢柴胡山梔茯苓木通而愈至丁酉九月又因勞役小便淋瀝莖痒竅痛仍服前湯加木通茯苓膽草澤

瀉及地黃丸而愈

大尹顧榮甫尾閭作痒小便赤滯左尺脉洪數屬腎經
虛熱法當滋補彼不信乃服黃栢知母等藥年許高骨
腫痛小便淋瀝肺腎二脉洪數無倫余曰子母俱敗無
能為矣後果歿

余甲辰仲夏在橫金陳白野第會其外舅顧同厓求余
診脉左尺澁結右寸洪數余曰此肺金不能生腎水誠
可慮果至季冬莫道澁痛如淋愈痛則愈欲便愈便則

愈痛而歿

脾肺腎虧損虛勞怯弱等症

七

庶吉士黃伯鄰發熱吐痰口乾體倦自用補中益氣湯不應余謂此金水俱虛之症兼服地黃丸而愈後背患一癩煩痛寒熱彼因前月嘗偕往視郭主政背疽郭不經意余決其殞於金旺之日果符余言已而郭氏妻孥感其毒皆患惡瘡伯鄰所患與郭患同心甚恐余曰此小瘡也憎寒等症皆陰虛舊症果是瘡毒亦當補氣血

余在弟就以地黄丸料煎與服之即睡良久各症頓退
自後常有頭面耳目口舌作痛或吐痰眩暈之類服前
藥即愈後任都憲督鹽法道出於蘇必垂顧焉

少司空何瀟川足熱口乾吐痰頭暈服四物黃連黃栢
飲食即減痰熱益甚用十全大補加麥門五味山藥山
茱而愈

一儒者或兩足發熱或脚跟作痛用六味丸及四物加
麥門五味玄參治之而愈後因勞役發熱惡寒作渴煩

躁用當歸補血湯而安

儒者劉允功形體魁偉冬日飲水自喜壯實余曰此陰虛也不信一日口舌生瘡或用寒涼之劑肢體倦怠發熱惡寒余用六味地黄補中益氣而愈

一男子腿內作痛用滲濕化痰藥痛連臂肉面赤吐痰脚跟發熱余曰乃腎虛陰火上炎當滋化源不信服黃栢知母之類而歿

余甥居宏年十四而娶至二十形體豐厚發熱作渴面

亦作脹或外為砭血內用降火肢體倦怠痰涎愈多脉洪數鼓指用六味丸及大補湯加麥門五味而痊

余甥凌雲漢年十六庚子夏作渴發熱吐痰唇燥遍身生疥兩腿尤多色黯作痒日晡愈熾仲冬腿患瘡尺脉洪數余曰疥腎疔也瘡骨疽也皆腎經虛症針之膿出其氣氤氳余謂火旺之際必患瘡症遂用六味地黃十全大補不二旬諸症愈而瘡症具仍用前藥而愈抵冬娶妻至春其症復作父母憂之伴其外寢雖其年少謹

疾亦服地黄丸數斤煎藥三百餘劑而愈

其弟雲霄年十五壬寅夏見其面赤唇燥形體消瘦余曰子病將進矣癸卯冬復見之曰子病愈深矣至甲辰夏胃經部分有青色此木乘土也始求治先以六君加柴胡芍藥山梔蕪荑炒黑黃連數劑及四味肥兒六味地黄二丸及參苓白朮歸芍山梔麥門五味炙草三十餘劑肝火漸退更加膽草柴胡三十餘劑乃去芍加肉桂三十餘劑及加減八味丸元氣漸復而愈

脾肺腎虧損遺精吐血便血等症八

少宰汪涵齋頭暈白濁余用補中益氣加茯苓半夏愈而復患腰痛用山茱山藥五味草薢遠志頓愈又因勞心盜汗白濁以歸脾湯加五味而愈後不時眩暈用八味丸全愈

南銀臺許函谷因勞發熱作渴小便自遺或時閉滯余作肝火血虛陰挺不能約制午前用補中益氣加山藥山茱午後服地黃丸月餘諸症悉退

司廳陳石鏡久患白濁發熱體倦用補中益氣加炮薑
四劑白濁稍止再用六味地黄兼服諸症悉愈

光祿柴黼庵因勞患赤白濁用濟生歸脾十全大補二
湯間服而愈

司廳張檢齋陰囊腫痛時發寒熱若小腹作痛則莖出
白津用小柴胡加山梔膽草萊菔芎歸而愈

朱工部勞則遺精齒牙即痛用補中益氣加半夏茯苓
芍藥并六味地黄丸漸愈更以十全大補加麥門五味

而痊

一男子白濁夢遺口乾作渴大便閉澀午後熱甚用補中益氣加芍藥玄參并加減八味丸而愈

一男子莖中痛出白津小便秘時作痒用小柴胡加山梔澤瀉炒連木通膽草茯苓二劑頓愈又兼六味地黄丸而痊

一男子發熱便血精滑○一男子尿血發熱○一男子發熱遺精或小便不禁俱屬腎經虧損用地黃丸益氣

湯以滋化源並皆得愈

一男子鰥居數年素勤苦勞則吐血發熱煩躁服犀角地黃湯氣高而喘前病益盛更遺精白濁形體倦怠飲食少思脉洪大舉按有力服十全大補加麥門五味山茱山藥而愈

儒者楊啓元素勤苦吐血發瘕不知人事余以為脾胃虛損用十全大補湯及加減八味丸而瘕愈再用歸脾湯而血止

一儒者因飲食勞役及惱怒眉髮脫落余以為勞傷精血陰火上炎所致用補中益氣加麥門五味及六味地黃丸加五味眉髮頓生如故

一男子年二十巔毛脫盡用六味地黃丸不數日髮生寸許兩月復舊○吳江史萬湖云有男女偶合眉髮脫落無藥調治至數月後復生

一童子年十四發熱吐血余謂宜補中益氣以滋化源不信用寒涼降火愈甚始謂余曰童子未室何腎虛之

有參芪補氣奚為用之余述丹溪先生云腎主閉藏肝
主疎泄二臟俱有相火而其系上屬於心心為君火為
物所感則易於動心動則相火翕然而隨雖不交會其
精亦暗耗矣又精血篇云男子精未滿而御女以通其
精則五臟有不滿之處異日有難狀之疾遂用補中益
氣及地黃丸而瘥

一男子咳嗽吐血熱渴痰盛盜汗遺精用地黃丸料加
麥門五味治之而愈後因勞怒忽吐紫血塊先用花蕊

石散又用獨參湯漸愈後勞則咳嗽吐血一二口脾肺腎三脉皆洪數用補中益氣六味地黃而全愈

辛丑夏余在嘉興屠內翰第遇星士張東谷談命時出中庭吐血一二口云久有此症遇勞即作余意此勞傷肺氣其血必散視之果然與補中益氣加麥門五味山藥熟地茯神遠志服之而愈翌早請見云每服四物黃連山梔之類血益多而倦益甚余得公一七吐血煩止神思如故何也余曰脾統血肺主氣此勞傷脾肺致血

妄行故用前藥健脾肺之氣而噓血歸源耳後率其子以師余余曰管見已行於世矣子宜覽之

肝脾腎虧損下部瘡腫等症九

通府黃廷用飲食起居失宜兩足發熱口乾吐痰自用二陳四物益甚兩尺數而無力余曰此腎虛之症也不信仍服前藥足跟熱痒以為瘡毒又服導濕之劑赤腫大熱外用敷藥破而出水久而不愈及用追毒丹瘡突如桃始信余言滋其化源半載得瘥

儒者章立之左股作痛用清熱滲濕之藥色赤腫脹痛連腰脇腿足無力余以為足三陰虛用補中益氣六味地黃兩月餘元氣漸復諸症漸退喜其慎疾年許而痊府庠鍾之英兩腿生瘡色黯如錢似癬者三四痒痛相循膿水淋漓脯熱內熱口乾面黧此腎虛之症用加味六味丸數日而愈此等症候用祛風敗毒之劑以致誤人多矣

一男子素遺精脚跟作痛口乾作渴大便乾燥午後熱

甚用補中益氣加芍藥玄參及六味丸而愈

餘症見外科樞要

脾肺腎虧損大便秘結等症^十

一儒者大便素結服搜風順氣丸後胸膈不利飲食善消面帶陽色左關尺脉洪而虛余曰此足三陰虛也彼恃知醫不信乃服潤腸丸大便不實肢體倦怠余與補中益氣六味地黄月餘而驗年許而安若脾肺氣虛者用補中益氣湯若脾經鬱結者用加味歸脾湯若氣血

虛者用八珍湯加肉蓯蓉若脾經津液涸者用六味丸
若發熱作渴飲冷者用竹葉黃芪湯若燥在直腸用豬
膽汁導之若肝膽邪侮脾者用小柴胡加山梔郁李枳
殼若膏粱厚味積熱者用加味清胃散亦有熱燥風燥
陽結陰結者當審其因而治之若復傷胃氣多成敗症
一老儒素有風熱飲食如常大便十七日不通肚腹不
脹兩尺脉洪大而虛此陰火內燦津液用六味丸二十
餘劑至三十二日始欲去用豬膽潤而通利如常

一婦人年七十有三痰喘內熱大便不通兩月不寐脉
洪大重按微細此屬肝肺腎虧損朝用六味丸夕用逍
遙散各三十餘劑計所進飲食百餘碗腹始痞悶乃以
猪膽汁導而通之用十全大補調理而安若間前藥飲
食不進諸症復作

一男子年五十餘因怒少食大便不利服潤腸丸大便
秘結胸脇作痛欲兼服脾約丸肝脾腎脉浮而濡余曰
此足三陰精血虧損之症也東垣先生云若人胃強脾

弱約束津液不得四布但輸膀胱小便數而大便難者
用脾約丸若人陰血枯槁內火燔灼肺金受邪土受木
傷脾肺失傳大便秘而小便數者用潤腸丸令滋其化
源則大便自調矣如法果驗

一儒者懷抱鬱結復因場屋不遂發熱作渴胸膈不利
飲食少思服清熱化痰行氣等劑前症益甚肢體倦怠
心脾二脉瀋滯此鬱結傷脾之變症也遂用加味歸脾
湯治之飲食漸進諸症漸退但大便尚瀋兩額赤色此

肝腎虛火內傷陰血用八珍湯加茯苓麥門五味至三十餘劑大便自潤○一男子所患同前不信余言服大黃等藥泄瀉便血遍身黑黯復求治余視之曰此陰陽二絡俱傷也經曰陽絡傷則血外溢陰絡傷則血內溢辭不治後果然

職方陳義齋年踰六旬先因大便不通服內疏等劑後飲食少思胸腹作脹兩脇作痛形體倦怠兩尺浮大左關短濡右關弦濡時五月請治余意乃命門火衰不能

生脾土而肺金又尅肝木憂其金旺之際不起後果然

各症方藥

十二

小柴胡湯 治肝膽症寒熱往來或日晡發熱或濕熱
身熱默默不欲食或怒火口苦耳聾咳嗽發熱脇下
作痛甚者轉側不便兩祛痞滿或泄瀉咳嗽或吐酸
食苦水或因怒而患瘧痢等症

柴胡

二錢

黃芩

一錢五分

人參

半夏

各七分

甘草

五分

右薑水煎服

加味小柴胡湯 治血虛大勞大怒火動熱入血室或
婦女經行感冒發熱寒熱如瘧夜間熱甚或譫語即
前方加生地黃一錢

黃芩半夏生薑湯 治膽腑發咳嘔苦水如膽汁

黃芩

炒

生薑

各三錢

甘草

炙

半夏

各二錢

右薑水煎服

桔梗湯 治心臟發咳嗽而喉中如梗狀甚則咽腫喉

痺

苦梗

錢三

甘草

錢六

右水煎服

芍藥甘草湯

治小腸腑發咳咳而失氣

芍藥

甘草

各四錢

右水煎服

升麻湯

治脾臟發欬欬而右脇下痛痛引肩背其前

不可以動

升麻

白芍藥

甘草

各二錢

葛根

錢三

右水煎服

烏梅丸

治胃腑發欬欬而嘔嘔甚則長蟲出

烏梅

三十箇

細辛

附子

桂枝

人參

黃栢

各六

錢

乾薑

一兩

黃連

五錢

當歸

蜀椒

各四兩

右為末用酒浸烏梅一宿去核蒸之與米飯搗如泥
丸桐子大每服三十九白湯下

麻黃湯

治肺臟發欬欬而喘急有聲甚則唾血

麻黃

三錢

桂枝

二錢

甘草

一錢

杏仁

二十箇

右水煎服

赤石脂禹餘糧湯 治大腸腑發欬欬而遺屎

赤石脂

禹餘糧

各二兩
並打碎

右水煎服

麻黃附子細辛湯 治腎臟發欬欬則腰背相引而痛

甚則欬涎又治寒邪犯齒致腦齒痛宜急用之緩則

不救

麻黃

細辛

各二錢

附子

一錢

右水煎服

茯苓甘草湯 治膀胱發欬欬而遺溺

茯苓

二錢

桂枝

二錢五分

生薑

五大片

甘草

炙一錢

右水煎服

異功散 治久欬不已或腹痛少食面腫氣逆又治脾

胃虛弱飲食少思等症

人參

茯苓

白朮

甘草

陳皮

各等分

右每服三五錢薑棗水煎

法製清氣化痰丸 順氣快脾化痰消食

半夏 南星

去皮

白礬

皂角

切 乾薑

各四兩

右先將白礬等三味用水五碗煎取水三碗却入半夏二味浸二日再煮至半夏南星無白點為度曬乾

陳皮

青皮

去穢

紫蘇子

炒

蘿蔔子

炒另研

葛根

神

麴

炒

麥蘖

炒

杏仁

去皮尖炒研

山查子

香附子

各二兩

右為末蒸餅丸桐子大每服五七十九臨卧食後茶

湯下

升陽益胃湯 治脾胃虛弱肢體怠惰或體重節痛口

舌乾渴飲食無味大便不調小便頻數飲食不消兼
見肺病洒淅惡寒悽慘不樂乃陽不和也

羌活 獨活 防風 各五錢 柴胡 白朮 茯苓 渴

不用 澤瀉 各三錢 人參 半夏 甘草 各一兩 黃芪 二兩 芍

藥 黃連 陳皮 各四錢

右每服三五錢薑棗水煎早溫服如小便愈而病益
加是不宜利小便也當少減茯苓澤瀉

生脉散 治熱傷元氣肢體倦怠氣短懶言口乾作渴
汗出不止或濕熱大行金為火制絕寒水生之源
致肢體痿軟脚軟眼黑最宜服之

人參

五錢

五味子

麥門冬

各三錢

右水煎服

清燥湯 治元氣虛濕熱乘之遍身痠軟或肺金受邪
絕寒水生之源腎無所養小便赤少大便不調腿
腰痿軟或口乾作渴體重麻木頭目眩暈飲食少思

或自汗盜汗肢體倦怠胸滿氣促

黃芪

一錢五分

黃連

神麩

炒

五味子

九粒并炒

猪苓

柴

胡 甘草

炙各二分

蒼朮

白朮

麥門冬

陳皮

生地黃

澤瀉

各五分

白茯苓

人參

當歸 升

麻

各三分

黃栢

酒拌一分

右水煎服

清暑益氣湯

治元氣弱暑熱乘之精神困倦胸滿氣

促肢節疼痛或小便黃數大便溏頻又暑熱瀉痢瘧

疾之良劑

升麻

黃芪

炒去汗
各一錢

蒼朮

一錢
五分

人參

白朮

陳

皮

神麴

炒各
五分

甘草

炙

乾葛

各三
分

五味子

九粒
杵炒

右水煎服

香茹飲

加黃連名黃
連香茹飲

治一切暑毒腹痛霍亂吐瀉或頭

痛昏憤

香薷

茯苓

白扁豆

厚朴

甘草

各一
錢

右水煎服

麥門冬湯 治火熱乘肺欬唾有血

麥門冬

去心

防風

各二錢

白茯苓

二錢

人參

一錢

右水煎服

二神丸 治脾腎虛弱侵晨五更作瀉或全不思食或食而不化大便不實神效

破故紙

四兩炒

肉豆蔻

二兩生用

右為末用大紅棗四十九枚生薑四兩切碎用水煮熟去薑取棗肉和藥丸桐子大每服五十九空心鹽

湯下

五味子散 治腎泄在侵晨五更作瀉飲食不進或大便不實不時去後為丸尤效

五味子

炒二兩

吳茱萸

炒五錢

右為末每服二錢白湯調

四神丸 治脾腎虛弱大便不實飲食不思

肉豆蔻

補骨脂

五味子

吳茱萸

各為末

生薑

四兩 紅棗

五十枚

右用水一碗煮薑棗去薑水乾取棗肉丸桐子大每服五七十九丸空心日前服

保和丸 治飲食停滯胸膈痞滿或吞酸腹脹

神麴

炒

半夏

茯苓

各一兩

山查

取肉二兩蒸

蘿蔔子

炒

陳皮

連翹

各五錢

右為末粥丸加白朮二兩名大安丸

越鞠丸 治六鬱胸膈痞滿或吞酸嘔吐飲食不化

蒼朮

神麴

撫弓

麥芽

炒

香附

山查

山

梔各等分

右為末水調神麩麥芽末糊丸桐子大每服六七十

丸滾湯下

茵陳五苓散 治酒積分利其濕

茵陳 白朮

猪苓

各一錢

桂

三分

澤瀉

一錢五分

右水煎服

葛花解酲湯 治酒積上下分消

白豆蔻

砂仁

葛花

各半兩

木香

五分

青皮

三錢

陳皮

白茯苓 猪苓 人參各一錢半 白朮 神麩炒 澤

瀉 乾薑各二錢

右為末每服五錢白湯調得微汗酒病去矣

益黃散 治脾土虛寒寒水反來侮土而嘔吐不食或
肚腹作痛或大便不實手足逆冷等症

陳皮一兩 青皮 阿子肉 甘草炙 丁香各二錢

右每服四錢水煎服

人參安胃散 治脾胃虛熱嘔吐或泄瀉不食

人參

錢一

黃芪

錢二

生甘草

炙甘草

各五分

白芍藥

七分

白茯苓

四分

陳皮

三分

黃連

二分

右水煎服

人參養胃湯

治外感風寒內傷飲食寒熱頭疼或作

瘧疾

半夏

厚朴

薑製

橘紅

各八分

藿香葉

草菓

茯苓

人參

各五分

甘草

炙三分

蒼朮

錢一

右薑七片烏梅一箇水煎服

藿香正氣散 治外感風寒內停飲食頭疼寒熱或霍

亂泄瀉或作瘧疾

桔梗 大腹皮 紫蘇 茯苓 厚朴 甘草

製各一錢

炙五分 藿香 一錢五分

右薑棗水煎熱服

白虎湯 治胃熱作渴暑熱尤効

知母 石膏 各二錢 粳米 半合

右水煎服

竹葉黃芪湯 治胃虛火盛而作渴

淡竹葉

二錢

黃芪

生地黃

麥門冬

當歸

川

芎

甘草

黃芩

炒芍藥

人參

石膏

煨各一錢

右水煎服

竹葉石膏湯

治胃火盛而作渴

淡竹葉

石膏

煨

桔梗

木通

薄荷葉

甘草

各一錢

右水煎服

四七湯 治七情鬱結心腹絞痛或為膨脹

人參 官桂

半夏

洗七次
各一錢

甘草

炙五分

右薑水煎服

青州白丸子 治風痰咳嗽或牙關緊急或痰喘體麻

南星

三兩 半夏

七兩

白附子

一兩 川烏

半兩各
生用

右為末絹袋盛井水擺浸仍換水浸三五日晒乾糯
米粉丸如急用以薑汁糊丸亦可

左金丸

一名四
金丸

治肝火脇刺痛或發寒熱或頭目作痛

或大便不實或小便淋秘或小腹疼痛一切肝火之症

黃連

六兩

吳茱萸

一兩湯煮片時用

右為末粥丸白朮陳皮湯下

當歸龍薈丸

治肝經實火大便秘結小便澀滯或胸

膈作痛陰囊腫脹凡屬肝經實火皆宜用之

當歸

龍膽草

梔子仁

黃連

黃芩

各一兩

大

黃

蘆薈

青黛

各五錢

木香

二錢五分

麝香

另研五分

右為末炒神麩糊丸每服二十九薑湯下

神效黃芪湯 治渾身或頭面手足麻木不仁目緊縮

小及羞明畏日或視物不明

黃芪

二兩

人參

八錢

甘草

炙

白芍藥

各一兩

蔓荊子

一兩

陳

皮

五錢

右每服五錢水煎臨卧熱服如麻木不仁雖有熱症不用黃栢加黃芪

益氣聰明湯 治久病或因尅伐脾胃傷損眼目昏暗

或飲食失節勞役形體脾胃不足得內瘵耳鳴之患
或多年眼目昏暗視物不明此藥能令廣大聰明久
服無內瘵外瘵耳鳴耳聾等症

黃芪

甘草

灸

人參

各五錢

蔓荊子

一錢五分

升麻

葛

根

各三錢

芍藥

黃栢

酒炒各一錢

右每服五錢水煎臨卧并五更服

芍藥清肝散 治眇多眊燥緊澁羞明赤脉貫睛臟腑

秘結

白朮 甘草 川芎 防風 荊芥 桔梗 羌

活各三分 芍藥 柴胡 前胡 薄荷 黃芩各二分

山梔 知母 滑石 石膏各二分 大黃四分 芒硝二分

半

右水煎食後熱服

黃連 天花粉丸 治症同上

黃連 菊花 川芎 薄荷各一兩 天花粉 連翹

黃芩 梔子各四兩 黃柏六兩

右為末滴水丸桐子大每服五十九加至百丸食後
臨卧茶湯下

嗜鼻通氣散 治眼腫脹赤昏暗羞明癰澁疼痛或風
痒鼻塞頭痛腦酸外翳攀睛眵淚稠粘

鴛不食草

二錢

青黛

川芎

各一錢

右為末含水滿口每用如米許嗜鼻內淚出為度

選奇湯 治風熱上壅眉稜骨痛或頭目眩暈

羌活

防風

各三錢

甘草

二錢 炙
生冬炒

黃芩

酒製冬去
之熱甚用

右每服三錢水煎時時服

助陽活血湯 治眼睫無力常欲垂閉餘治同上

黃芪

甘草

炙

防風

當歸

各五分

白芷

四分

蔓荊子

四分升麻

七分

右水煎食後熱服

益陰腎氣丸 治症同上

熟地黄

三兩

當歸

酒洗

柴胡

五味子

乾山藥

山

茱萸

去核各半兩

茯苓

澤瀉

各二錢半

生地黃

酒炒四兩

右為末煉蜜丸桐子大每服百丸茶湯下日二三服
連翹飲 治目中溜火惡日與火癰澁小角緊久視昏
花迎風有淚

蔓荊子

生甘草

連翹

各三錢

柴胡

五錢

黃芩

酒製五分

生地黄

當歸

紅葵花

人參

各三分

黃芪

五分升

麻一錢防風

羌活

各二分

右水煎服

地芝丸

治目不能遠視能近視或妨近視

生地黃

焙乾
四兩

天門冬

去心

枳殼

麩炒

真甘菊花

各二兩

右為末煉蜜丸桐子大每服百丸茶清或溫酒下

定志丸 治目不能近視反能遠視

白茯苓

人參

各二兩

遠志

去心

菖蒲

各一兩

右為末煉蜜丸桐子大以硃砂為衣每十九至三十

丸米飲食後下日三服

大蘆薈丸

一名九味蘆薈

治大人小人下疳潰爛或作痛又治

肝疳食積口鼻生瘡牙齦蝕爛

胡黃連 黃連 蘆薈 木香 白蕪荑炒 青皮

白雷丸

鶴虱草

各一兩

麝香

三錢

右為末蒸餅糊丸如麻子大每服一錢空心米飲下

四味肥兒丸

一名小肥兒丸

治諸疔發熱目生雲翳口舌生瘡

或牙齦腐爛肌肉消瘦遍身生瘡等症與地黃丸兼

服

黃連

炒

蕪荑

炒

神麩

炒

麥芽

炒各

等分

右各為末水糊丸桐子大每服二三十丸空心白湯

下

阿魏膏 治一切瘡塊更服胡連丸

羌活 獨活 玄參 官桂 赤芍藥 川山甲

生地黄 兩頭尖 大黃 白芷 天麻 各五錢

槐柳桃枝

各三錢

紅花

四錢

木鱉子

二十枝 去殼

亂髮

如雞子大

塊一

右用香油二斤四兩煎黑去渣入髮煎髮化仍去粗
徐下黃丹煎軟硬得中入朴硝阿魏蘇合油乳香沒

藥各五錢麝香五錢調勻即成膏矣攤貼患處內服
丸藥黃丹須用真正者効凡貼膏藥先用朴硝隨患
處鋪半指厚以紙蓋用熱熨斗熨良久如硝耗再加
熨之二時許方貼膏藥若是肝積加蘆薈末同熨

桃仁承氣湯 治血結胸中手不可近或中焦蓄血寒
熱胸滿漱水不欲嚥善忘昏迷其人如狂

桃仁

半兩

大黃

一斤

甘草

二錢

桂

三錢

芒硝

三錢

右每服一兩薑水煎

抵當湯 治下部蓄血腹內作痛手不可近或發狂少
腹滿硬小便自利大便反黑如狂者在中發狂者在
下也

大黃

水蛭

炒各半兩

蟪蟲

去翅足

桃仁

各三錢

右每服五錢水煎服如作丸煉蜜和之

花蓋石散

硫黃

上色明淨者四兩

花蓋石

一兩

右各為末拌勻先用紙筋和鹽泥固濟瓦罐一箇泥

乾入藥仍用泥封口候乾用炭周疊煨赤罐冷取出
為細末每服一錢童便酒下

搜風順氣丸

治痔漏風熱閉結

車前子

兩半

大麻子

微炒

大黃

五錢半
生半熟

牛膝

酒浸

郁李仁

兔絲子

酒浸

枳殼

山藥

各二錢

右為末煉蜜丸桐子大每服三十九白湯下

五淋散

治膀胱有熱水道不通淋澁不出或尿如豆

汁或成沙

或如膏汁或熱拂便血

赤茯苓

一錢五分

赤芍藥

山梔

各一錢

當歸

甘草

各一

錢五分

右入燈心水煎服

加味道遙散

治肝脾血虛發熱或潮熱晡熱或自汗

盜汗或頭痛目澁或怔忡不寧或頰赤口乾或月經

不調肚腹作痛或小腹重墜水道澁痛或腫痛出膿

內熱作渴等症

當歸芍藥

茯苓

白朮

炒

柴胡

各

牡丹皮

山梔

炒

甘草

炙各五分

右水煎服

逍遙散即前方去山梔牡丹皮

還少丹 治脾腎虛寒飲食少思發熱盜汗遺精白濁
又治真氣虧損肌體瘦弱等症

肉蓯蓉

遠志

去心

茴香

巴戟

乾山藥

枸杞

子 熟地黄

石菖蒲

山茱萸

去核

牛膝

杜仲

去火

楮實子

五味子

白茯苓

各一兩

右各另為末和勻用棗肉百枚并煉蜜九桐子大每服五七十九空心溫酒或鹽湯下日三服

交加散 治食瘧神效

肉豆蔻

二箇一
生一煨

草豆蔻

二箇一
生一煨

甘草

二錢半
炙半生用

厚

朴

二錢半製
用半生用

生薑

一兩煨五
錢生五錢

右薑水煎發日五更服

仲景白虎加桂枝湯 治溫瘧

知母

六錢

甘草

炙二錢

石膏

五錢

桂枝

一錢

粳米

一合

右水煎服此太陽陽明經藥也

柴胡桂薑湯 治寒多微有熱或但寒不熱名曰牝瘧

桂枝 黃芩 牡蠣 甘草 炙 乾薑 各一錢 栝蒌根

柴胡 各二錢

右水煎服汗出即愈此少陽經藥也

桂枝羌活湯 治瘧處暑以前發頭項痛脉浮惡風有

汗

桂枝 羌活 防風 甘草 各一錢五分

右水煎發而服如吐加半夏麩

麻黃羌活湯 治症如前但惡風而無汗

麻黃

去節

羌活

防風

甘草

各半兩

右如前服加法同上二方太陽經藥也

白芷湯 治瘧病身熱目痛熱多寒少脉長先以大柴

胡下之餘熱不盡當服此湯

白芷

一兩

知母

一兩

石膏

四兩

右依前服此陽明經藥也

桂枝芍藥湯 治瘧寒熱大作不論先後此太陽陽明合病寒熱作則必戰慄經曰熱勝而動也發熱汗出不愈內熱也此湯主之

桂枝

五分

黃芪

知母

石膏

芍藥

各二錢

右水煎此太陽陽明經藥也

桂枝黃芩湯 如服前藥轉劇三陽合病也宜此和之

柴胡

一錢五分

黃芩

人參

甘草

各八分

半夏

石膏

知母

各五分

桂枝

二分

右依前服如外邪已解而內邪未已從卯至午發者宜大柴胡下之從午至酉發者邪氣在內也宜大承氣下之從酉至子發者或至寅發者邪氣在血也

桂枝石膏湯 治瘧隔日發先寒後熱寒少熱多

桂枝

五錢

黃芩

一兩

石膏

知母

各一兩

五錢

右水煎分三服此太陽陽明經藥也

麻黃黃芩湯 治瘧發如前而夜發者

麻黃

一兩
去節

甘草

炙三錢

桂

二錢

黃芩

五錢

桃仁

三十箇
去皮尖

右依前服桃仁味苦甘辛肝者血之海血驟則肝氣燥經所謂肝苦急食甘以緩之故桃仁散血緩肝謂邪氣深遠而入血故夜發此湯發散血中風寒乃三陰經藥也

香連丸 治痢疾并水瀉暑瀉甚效

黃連

淨二
十兩

吳茱萸

去枝梗
十兩

右先將二味用熱水拌和入磁器內置熱湯頓一日同炒至黃連紫黃色去茱萸用連為末每末四兩入木

香末一兩淡醋米飲為丸桐子大每服二三十丸滾湯下久痢中氣下陷者用補中益氣下中氣虛者用四君子下中氣虛寒者加薑桂

三黃丸 治熱痢腹痛或口舌咽喉齒痛及一切實火症

黃芩 黃連 黃柏

各等分

右各另為末水丸桐子大每服七八十九白湯下

芍藥湯 治便血後重經曰澁而便膿血知氣行而血

止也行血則便自愈調氣則後重自除

芍藥

一兩

當歸

黃連

各半兩

檳榔

木香

甘草

各

二錢桂

二錢五分

黃芩

五錢

右每服半兩水煎如痢不減加大黃

加減濟生腎氣丸

治脾腎虛腰重脚腫小便不利或

肚腹腫脹四肢浮腫或喘急痰盛已成蠱症其效如

神

白茯苓

三兩

附子

半兩

川牛膝

肉桂

去皮

澤瀉

車前

子

山茱萸

山藥

各一兩

牡丹皮

一兩

熟地黃

四兩酒拌搗碎

青 行

右為末加煉蜜九桐子大每服七八十九空心白湯

下

三因當歸散 治脾土不能制水水氣盈溢滲透經絡

發為水腫

木香 赤茯苓 當歸 桂 木通 赤芍藥

牡丹皮 檳榔 陳皮 白朮

各等分

右每服五錢水煎服

不換金正氣散 治脾氣虛弱寒邪相搏痰停胸膈致發寒熱或作瘧疾

厚朴

去皮
姜製

藿香

半夏

薑製

蒼朮

米泔
浸

陳皮

各一錢

甘

草

炙五分

右薑棗水煎服

七味白朮散 治中氣虧損津液短少口舌乾渴或口

舌生瘡不喜飲冷或吐瀉後口乾最宜服

人參 白朮 木香 白茯苓 甘草 藿香 各五

分 乾葛 錢一

右水煎服

參苓白朮散 治脾胃不和飲食少進或嘔吐泄瀉凡

病後宜此調理

人參 茯苓 白扁豆 去皮薑汁半炒 白朮 炒 蓮肉 去皮

砂仁 炒 薏苡仁 炒 桔梗 炒 山藥 甘草 炙各二兩

右為末每服二三錢用石菖蒲湯下或作丸

半夏湯 治膽腑實熱精神恍惚寒熱泄瀉或寢寒增

風善太息

半夏

一錢五分

黃芩

一錢

遠志

一錢

生地黄

二錢

秫米

一合

宿薑

一錢五分

酸棗仁

三錢炒

右長流水煎服

犀角地黄湯 治血虛火盛血妄行吐衄便下若因忿

怒而致加山梔柴胡

犀角

鎊末

生地黄

白芍藥

牡丹皮

各一錢半

右水煎傾出入犀末服之

人參平肺散 治心火刑肺金患肺痿咳嗽喘嘔痰涎

壅盛胸膈痞滿咽喉不益

人參四分 青皮四分 茯苓七分 天門冬四分 陳皮五分 地骨皮

甘草五分 知母七分 桑皮一錢 五味子一十粒
并碎

右薑水煎服

清涼飲 治實熱便秘或喉中腫痛

當歸 赤芍藥 甘草炙 大黃蒸各等分

右每服五錢水煎服

清胃散 治醇酒厚味唇齒作痛或齒齦潰爛或連頭

面頸項作痛

黃連

炒一錢半

當歸

生地黄

牡丹皮

各一錢

升麻

二錢

右水煎服

犀翹清胃散 前方加犀角連翹甘草

涼膈散 治實熱喉舌腫痛便溺秘結

大黃 朴硝 甘草 梔子仁 黃芩 薄荷葉

各一
連翹
兩四

右為末每服四五錢竹葉蜜少許煎服仍量加減

潤腸丸 治伏火風熱大腸乾燥若因失血或因腎不足當滋腎最忌此丸

麻子仁

桃仁

去皮尖另研各一兩

羌活

當歸尾

大黃

煨

皂角仁

秦艽

各五錢

右另研為末煉蜜丸猪膽汁丸尤妙每服三十九食前滾湯下若燥在直腸用猪膽汁導之亦忌前藥

滋腎丸 治熱在血分不渴而小便不利或腎虛尺熱
腿膝無力不能履地

知母

黃栢

各酒炒
二兩

肉桂

二錢

右各另為末水丸桐子大每服二百丸空心百滾湯
下

黃芩清肺飲 治肺熱小便不利宜用此藥清之

黃芩

一錢

山梔

二錢

右水煎服不利加鹽豉二十粒

清心蓮子飲 治熱在氣分口乾作渴小便白濁夜安

晝熱或治口舌生瘡咽乾煩躁作渴小便赤淋

黃芩

炒

麥門冬

地骨皮

車前子

炒

甘草

各一錢半

石蓮肉

茯苓

黃芪

柴胡

人參

各一錢

右每服五錢水煎服

調中益氣湯

治濕熱所傷體重煩悶口失滋味二便

清數或痰嗽稠粘熱壅頭目體倦少食等症

黃芪

錢一

人參

去蘆

甘草

蒼朮

各五分

柴胡

橘皮

升麻 木香

各二分

右水煎空心服

三生飲 治卒中昏不知人口眼喎斜半身不遂并痰

厥氣厥

南星

一兩
生用

川烏

去皮
生用

附子

去皮生用
各半兩

木香

二錢

右每服五錢薑水煎

秦艽升麻湯 治風寒客手足陽明經口眼喎斜惡見

風寒四肢拘急脉浮緊

升麻 乾葛 甘草 芍藥 人參 秦朮 白

芷 防風 桂枝

各三錢

右每服一兩葱白二根水煎

愈風丹 治諸風肢體麻木手足不隨等症

天麻 牛膝

同酒浸培乾

草薢

另研細

玄參

各六兩

杜仲

七兩

羌活

十四兩

當歸

熟地黃

白製

生地黃

各一斤

獨活

五兩

肉桂

三兩

右為末煉蜜丸桐子大常服五七十九病大至百九

空心食前溫酒或白湯下

地黃飲子 治腎氣虛弱舌瘡不能言足廢不能行

熟地黃

巴戟

去心


山茱萸

去核

肉蓯蓉

酒浸

石斛

附子


五味子

白茯苓

石菖蒲

遠志

去心 麥

門冬

官桂

各等分

右每服三錢入薄荷少許薑棗水煎服

餘方見上卷

薛氏醫案卷二